

陵川縣志卷九上

士女錄

陵川人才自元中葉以來頗見衰歇惟氣運盛衰亦有定數鬱之久則宣之也大太行豪傑所自出國難方殷環境壓迫或將挺出一救世偉人一爲吾人增光輝而繼文忠之芳烈亦未可料是在青年之奮鬪耳昔管子謂禮義廉恥國之四維四維不張國乃滅亡貞節婦女志堅金石操潔冰霜於禮義廉恥四字洵屬完全無虧矣可不敬與惟清光緒八年至宣統末年二十餘年祇田星橋妻段氏牛喜捨妻趙氏王岳妻趙氏三人然二趙事蹟均不傳民國以來則無矣志士女

陵川縣志

卷九 士女錄

一

後漢陳龜字叔珍上黨泫氏人家世邊將便習弓馬雄於北州龜少有志氣永建中舉孝廉五遷五原太守永和中拜使匈奴中郎將時左部亂龜以單于不能制下從令自殺坐徵下獄免再遷京兆尹三輔豪強多侵枉小民龜到厲威嚴悉平理其怨屈者郡內大悅會羌胡寇邊桓帝以龜世知邊俗拜度遼將軍臨行上疎斥姦殘簡將校寬和赦罪帝悟自刺史太守都尉以下多所更易下詔爲陳將軍除并涼一年租賦龜既到職州郡震懾鮮卑不敢近塞省息經用歲以億計大將軍梁冀素有隙譖其沮毀國威挑取功譽坐徵還遂乞歸田里復徵爲尙書冀暴虐日甚上疎言其罪狀請誅之帝不省自知必爲冀所害不食

七日而死西域羌戎并涼民庶咸爲舉哀弔祭其墓

後漢書本傳

按陳龜籍沘氏漢陵川即沘氏地故并收載

北周郭誕任并州刺史細侯後也闡化以禮士夫仰其高風訓俗以仁百姓歌其盛德煒獨荷澤豪彊畏威

按舊志謂明嘉靖年孟志誕魏時人康熙年縣志誕宋人省志誕東晉人郡志誕北周人蓋不可考矣相傳闡化等六語爲基銘所戴未知確否然爲郭細侯後又同爲并州刺史或去漢不遠似以魏人爲是特無確據姑闕疑焉

唐郭樸制行孝弟稱文學儒者刺史屢薦不起清泉白石以此自終

陵川縣志

卷九 士女錄

二

武少儀自幼聰明過人日記數千言比長善詞賦惜多散逸舉明經不樂仕進往來蘇村山水間

宋張廷翰初爲五代後漢祖親校漢祖入汴補內殿直遷東西班軍使周世宗時改護聖指揮使從世宗平淮甸以功遷鐵騎右第二軍都虞侯顯德未改殿前散都頭都虞侯入宋權鐵騎右第二軍都校領開州刺史從平揚州又以功遷控左鶴廂都指揮使領果州團練使乾德中伐蜀以廷翰爲陽州路行營馬軍都指揮使隨劉廷讓由歸州路進討師次夔州廷讓頓兵白帝廟西俄而夔州監軍武守謙率所部來拒戰廷翰引兵逆擊敗之於猪頭鋪乘勝拔其城蜀平授侍衛馬步軍都虞侯領彰國

節度使開寶二年疾太祖親臨問卒年五十二贈侍中

宋史本傳

都貺字君錫以明經登進士第哲宗時官至朝請大夫鴻臚寺少卿每朝帝虛已諮訪貺據經正對多見嘉納拜梓州轉運使提押西川四十五州美績多著遷居錦屏山中爲芍藥會與一時名人谷漢臣高子美輩往來山中詠歌自得後屢薦不起墓在義門石羊虎猶存從祀鄉賢兄嚮進士別詳技術傳

按舊志兩載都貺一入節行一入隱逸竟似兩人矣略辨數語不詳不悉蓋不知其仕在前而隱在後也至云隱邑南之錦屏山縣令呂由庚聞之屢薦不出查呂由庚爲宋元豐中邑令都貺名在元祐黨籍中前秦觀黃庭堅後程頤鄭俠以

陵川縣志

卷九

士女錄

三

時代考之則其爲一人可知也但舊志聞之二字下筆欠斟酌遂滋疑耳今從朱太守澤州府新志作一人又府舊志隱逸作都君錫謂邑令呂熙道屢徵之不起查縣志宋邑令無此姓名自當以新志爲是

李大節唐韓王元嘉後志尙高潔爲當世所推工春秋毛詩尤精天官地輿之奧裔孫順封陵川男注籍陵川

李異受學於大愚公著有切韻門庭傳於二子長林次森同舉進士孫曼晏曾孫仲立仲略皆舉進士累葉以文章華國代多聞人

按李異李森等府志俱載高平而本縣志並收之且謂前籍

陵川後遷高平蓋李大節李順皆籍陵川至李異後則遷高平耳名家繼躅木本水源從寬備載尙不至貽譏於郢書燕說也

都嘉猷貺從子以明經舉進士初任信德令有惠政民愛如父母轉南京路兵馬都總管鈐制多偉績進天水開國子食邑五百戶賜紫金魚袋從祀鄉賢

崔有孚七狀元之一從祀鄉賢失傳

按舊志謂宋史選舉志無其人疑其爲武科或金元時人細閱宋史選舉志所載科名皆困條例有變而後載金元亦然非歷科備載如明史某科某人榜也則有無不足猷疑且邑

志有其登第詩非武科明矣

李森字彥實異次子年十八澤發解第一授萊州文學贈正議大夫天會間大飢斗米千錢流孳載路森出粟千斛賑之活者甚衆或曰易此可得數千緡森笑曰活人數不愈於得錢數千緡乎途遇行旅二人病仆垂斃掖至家醫治全愈皆感泣而去靖康之亂盜賊掠境森謂渠長日爾等止可取財但勿殺人賊皆羅拜而散其以德量感人類如此

武白授上京國子博士改臨潢縣令遷廣德軍節度副使先是有訟宰相劉慎行與子婦姚氏私者有司出其罪聖宗詔白鞠之白正其事使新羅還權中京留守時慎行諸子皆處權要以白

斷百姓分籍事不直坐左遷未幾遷尙書左丞知樞密事拜遼

興軍節度使致仕卒

遼史本傳

金劉昂霄父俞明昌中進士昂霄氣涵萬有於書無所不窺凡六經子史官制世譜靡不詳貫於兵家成敗尤歷歷如指諸掌少時讀廣記半月能背誦元好問嘗指試之一過目無遺脫每人座譚詞如雲脾腕一世聽者噤不得語評者謂王湯臣論人物李之純元談獨步昂霄則兼衆人之所獨愈叩而愈無窮明宋濂哀志士詞序列其五人劉昂霄其一也用門資叙調慶陽軍庫使不就臨終夢賦山泉詩云帶雲縈遠澗和月到疎林又云萬里馮唐老中年賈傅歸方薦宏詞未幾卒年三十七崇祀鄉

陵川縣志

卷九

士女錄

五

賢

趙振孝義好施父沒哀感路人析產推肥於其兄自取瘠者里中有貧不能婚葬悉力周賻又常注藥救病賑粟救飢賴以全活者甚衆至天眷貞元間二子安時安榮皆廷試第一崇祀鄉賢郡志作趙鎮

武明甫字無疑號太復加封光祿大夫太子太保戶部尙書太原郡侯賜諡文端生於金天會九年秉姿英異讀書一目數行行年二十四登正元二年詞賦科狀元及第初授翰林應奉文字尋遷秘書省校書郎轉著作郎大理正正隆三年轉儀曹郎掌書命四年拜諫議大夫右正言在職鯁正敢言海陵淫虐遷都

於汴不迎其母公上章切諫留中不報後欲舉兵南下公犯顏極諫謂我國家雖云兵強但新都於汴宜安輯人民固根本不聽謂阻撓軍機禍幾不測宰相李通申救方革職及世宗立於北京而海陵遇殺江南中外咸尊世宗爲皇帝查舊曾諫海陵者得公章曰使海陵聽此言何至失國遂詔起復以覃恩特晉公徵仕郎勅公從宰執完顏思敬修太祖太宗熙宗海陵實錄成直史館遷翰林修撰六年加侍講學士八年出爲安國軍節度副使時安國飢災公正整紛剔蠹恩煦信孚勸農桑興教化期月而民獲蘇詔還復爲翰林侍講學士上問古今儒士優劣古對稱旨又嘗諮治道公曰恩賞明則賢人君子勸刑罰當則

奸宄小人消言君能如此則天下不勞而治公蓋因時啓沃也十一年遷兵部侍郎尋改戶部侍郎十三年又出爲應州彰國軍節度使時南北和好國家無事公上章於朝謂天下雖安然忘戰必危上優詔答之十九年遷西京路兵馬都總管兼留守司副使尋又遷戶部尙書二十五年以年老乞致仕章數上世宗溫旨留後見其詞懇切准令致仕賜黃金百兩白絹百疋蓋以公廉介故優崇之及旋里築室於縣東北高阜處扁曰樂天園飲酒賦詩酒然無累卒於大安三年三月初二日壽八十一賜諡文端崇祀鄉賢子天中廕授太常寺簡閱孫二桂槐廕授樞密院檢校

武俊臣字秉鈞明甫弟才高學富登正隆進士與文端公兄弟聯芳初授著作郎世宗即位以公爲章武軍節度使掌書記以精密謹慎稱陞戶部度支司員外會計精核以能幹擢樞密都承旨權中京留守遷大理司少卿丁父憂服闋起復爲大理司少卿公明法而恕冤獄全活者甚衆丁母憂服闋起爲西京副留守時承平雖久人尙不知學公上章極言宜立學校以儲人才厚風俗上於是令天下府州縣設學養士公在西京政寬刑簡民咸安之以考績稱最命公爲三司副使與宰相張不合出爲永定軍節度使上廉知其賢名爲禮部侍郎上春秋漸高而公以髦年上喜其老誠眷注甚篤大定二十七年章屢上乞方許

致仕照例賜公銀帛夫役公歸家與兄文端及趙全老昆季並在縣諸公優游樂天園飲酒賦詩以盡餘年知足不辱知止不殆其公之謂乎子天授廕授供奉班歷監司管勾改耀州防禦使兼理白河三渠規措使姪天常廕授大常寺檢討以能幹陞國史院編修

武天佑字繁祉號靈承明甫姪纔四歲口授書即不忘少長專務性理之學年十九詣京省季父文端公文端公叩其所學應對從容源流畢貫命之試試出文端亟賞其文及放榜無名季父意不平公曰姪遲一日功名多一日學問叔何憾焉乃辭歸閉戶與弟讀書至承安四年登詞賦科狀元及第初授翰林應奉

文字泰和三年章宗詢及河洛公舉疇圖表補之義明白闡發上嘉曰眞翰林進公經筵講官公進講每以存天理遏人欲進君子退小人爲言八年勅命公典試時當道有所託却之遂失當道意數年不調時蒙古猖獗西京留守忽沙虎驕傲不仁士卒離心公以爲憂上安邊三策會帝崩不果行及衛王即位上章言蒙古作亂緣我將驕卒惰耳陛下即位之初宜簡士卒謹烽燧擇有才望大臣督之庶保無虞不然臣恐西京非國家有也策上不行及泰安三年蒙古攻西京忽沙虎果敗上怒欲誅之虎懼遂與其黨剽衛王迎宣宗立之遂上章乞休與弟歸隱所著有經史撮要大學補及言志等集崇祀鄉賢

武天和字繁禧號猶龍天佑弟賦質異常見書輒如讀過偶入城適有鬪者見公驚相顧鬪遂止其丰采動人如此泰和中以經義科狀元及第傳臚時上問曰汝明甫姪天佑耶曰唯上喜曰汝叔姪昆季連中三狀元雖爾一門之慶亦邦家之光也因御書三狀元第四字令懸於門以榮之初授翰林應奉文字補尙書省令史時權倖欲援公兄弟爲黨公不應甚銜之及章宗崩衛王即位公上書其略曰今朝廷之上君子謂小人爲小人小人亦謂君子爲小人倘不之辨其不至結爲朋黨以敗國事也幾何且小人動輒左袒小人直欲使舉朝皆爲小人而後遂己之奸心動輒媒蘖君子直欲使舉朝不爲君子而後快己之忌

心云云於是權倖思陰傷之出公爲利州觀察判官尋轉歸州觀察使司崇寧元年得李公翰林應奉承旨獻能疏仍入爲翰林侍讀尋陞學士時蒙古氣正熾朝廷不爲意公上章條陳邊事甚悉不聽遂與兄並乞致仕隱居樂天園杜門不談時事生平愛武侯靜以修身儉以養德數語揭之座右以教子姪所著有永言集典內外篇審儉彥語等書崇祀鄉賢

趙安時字全老號東岡貞元中狀元及第官中順大夫南京路兵馬都總管上騎都尉永定軍節度使天水縣開國子食邑五百戶賜紫金魚袋崇祀鄉賢

趙安榮安時弟天眷中狀元及第官朝請大夫永定軍節度使崇

陵川縣志

卷九 士女錄

九

祀鄉賢

趙文昌泰和中進士仕至京兆轉運使嘗有詩云蟲聲連壞壁樹色入秋窻草香花落處山黑雨來時爲時所稱

姬守中大定時人工書尤善行草見龍岩寺碑

韓德輔藏書萬卷善事母享年百六歲有五子皆承家學其季天祐舉孝廉

李曼森長子天德三年進士幼能賦任隰州軍士判官號稱循良從祀隰州廟庭興定未贈朝列大夫長子伯疇能文善騎射次仲立明昌二年進士歷政平化平秀容三縣令考績爲天下最終河東鹽鐵判官以中憲大夫致仕

李晏森次子祖若父皆宋聞人晏性警敏誅蕩尚氣節皇統六年登經義進士第調岳陽丞歷中牟令會海陵方營汴京運水於河晏領之晏以經三門之險前後失敗者衆乃白行臺以水散投於河使上取於下流人便之金世宗素識其才名尋召爲翰林繼以詔赦册命乏人選外任文章之士因舉晏遂遷直學士轉吏侍郎兼御史中丞有朝士以病謁告世宗意其詐謂晏曰卿素剛今某詐病以宰相親故畏而不糾耶晏對曰臣雖老平生所恃誠與直耳病而在告此小事臣容有不知畏宰相何圖焉旣出自送之日晏年老氣猶未衰初錦州龍宮寺撥賜民戶輸稅於寺僧久之皆以爲奴役辱冤苦不堪有欲訴者輒殺之

島中晏乃具奏世宗怒呼辨再三而後獲免者六百餘人章宗立畫十事以上謂宜輕租稅尚寬大等語又奏乞待制修撰官宜更直進讀陳言文字以廣視聽授沁南節度使致仕後復昭義節度使明昌六年歸老詔除其子仲略爲澤州刺史以便侍養年七十五卒謚文簡著有游仙集

李仲略晏子聰敏力學大定十九年詞賦進士爲澤州晉城令遷尚書令吏除翰林修撰一日奏事退金主願近臣曰仲略精神明健如俊鶻脫帽未幾以親病求侍特授澤州刺史父喪免起爲戶部郎中俄授翰林直學士充經義讀卷金主曰有司謂經義不如詞賦罷之何如仲略對曰經乃聖人之書明經所以適

用不可罷紇石立執中坐賊仲略鞠之當削奪一時權要皆言
太重仲略奏曰教化之行自近者始况執中兇殘狼復豈可宥
授山東廉訪泰和五年卒諡襄獻

秦略父事軻有詩名善書略少舉進士不第即棄不仕以詩名河
汾間自號西溪老人有集行世元遺山有送詩人秦略歸蘇墳
別業詩其臨終詩云軀殼羈縻宅兒孫邂逅恩雲山最佳處隨
意著詩魂崇祀鄉賢子彥容爲黃冠

按唐時寓賢有秦略非金源時善詩之秦略別入寓鄉傳

郝震字子陽父祚自潞遷陵川經之曾叔大父也讀書不尙訣聞
不求世味以經旨授學者析以天理人情而不專以傳注彈琴

得古遺音一日於道院松竹下鼓琴而歌睡鶴十餘驚起鳴舞
珊珊憂憂曲終乃去兄弟七諸兄以族大稱長兄之命異居震
涕泣三日不食曰諸兄得欲而生我將服義而死諸兄懼復聚
廬同食以終年四十九卒初名且自號東軒老人

郝源字清卿父曷曷即震之長兄郝氏以治經力行爲本曷以嫡
長蒞家有法制源以次秉家督時昆季十餘族長禔百餘口旣
總家事乃會戚屬告曰衣食足而知廉恥倉廩實而知禮節士
所以忘義失守至於沮氣墮節殆多逼於飢寒故孟子以農桑
爲三政之本今某以次爲家督欲諸宗親子弟治生爲學二者
兼進始則仰事俯育終焉立身行道進而得則各大爾家退而

失則必有所歸不至於落魄無賴亦足以爲善士夫少有大志不事家人生產雖或成就有過人者而爲書傳所稱亦非教育之良法乃量子弟之才器日畀汝田汝率農人治之畀汝桑汝率諸婦蠶之畀汝錢汝率商人治之畀汝書汝從某師友治之余則均其有無而察其勤惰其在家鷄鳴而冠依杖而立於庭諸房子弟婦其盥漱笄總黎明以次省於舅姑父兄退而各執所業或少有稽緩則責之庭少廢禮者則加鞭扶至於再會宗表列其狀而加之罰飲酒醉者有罰衣冠不正者有罰事師不謹者有罰惰於學者有罰相慕間者有罰譁於庭者有罰中堂曰棣華歲時燕集上下肅然二子輿輦輿字正之博學能文歿

於兵

郝天挺曷子其高曾以下皆學而不仕天挺始赴廷試以太學生頡頏搢紳間崇慶之變束載去之貞佑初入爭南渡阨於河上下千餘里流民數百萬死者十七八天挺乃貽書機察使范元直曰昔昭烈當陽之後既窘甚猶徐其行以俟荆襄遺民曰成大事者必資於衆人歸而棄之不祥君子謂漢統四百年此一言可以續今河朔民獨非子乎乞詔河津聚公私船晝夜放波以救遺民書奏即日放渡河朔之民全活甚多其教學以治經行己爲本太原元好問常從學進士業天挺曰今人賦學速售爲功六經百家分磔緝綴或篇章句讀不知幸而得之不免爲

庸人又曰讀書不爲藝文選官不爲利養惟通人能之又曰今之仕皆苦飢寒不能自持耳丈夫不耐飢寒一事不可爲子以吾言求之科舉在其中矣貞祐中居河南往來淇衛間爲人有崖岸耿耿自信寧落魄困窮終不一至貴豪之門興定元年年五十七歿於舞陽客舍子思溫歸葬於家

郝天祐字賢卿初爲學即不作決科文太安末知有後隍之變益遯默貞祐初南渡隱居魯山作爲詩歌往往散落人間玩意書法云當以篆隸意爲本大字雖大而小小字雖小而大正書須有草意草書須有正筆其論書如此趙內翰欲致之京師即避去山林人復知其處又欲薦於朝又避去元裕之聞其又遯乃

以詩相招復以詩絕之壬辰沒於兵年四十九一子思直博學能文亦沒於兵天祐弟天祺二人皆治經篤學不仕

郝思溫天挺子其先自八世而下皆同居業儒不仕教學以淑其里思溫秉資剛潔與世不偶年二十隨父下太行往來淇衛貞祐南渡族行父邁疾謂之曰郝氏業儒自吾叔父東軒老人始我墓墓側庶得奉杖履於地下旣祥將歸葬父兄以河朔兵亂不許乃夜啓殯負其骸以遯翼之行渡河至長垣資用爲盜厥從行者散去獨與妻許徒步負骸登太行盜掩至將兵之思溫時正病目暝不見物許獨不動盜曰若何人獨此不去所守者何寶許曰此我翁之靈將歸葬者有死而已其可去乎兇少沮

詢之曰我陵川許氏也昔兄曾脫盜盜驚遺白金數兩去時隆冬雪盛思溫目昏冒行風雪中不復辨蹊徑望峯巒爲的許時掖思溫而進纔半塗已入夜黎明始出山再日達陵川克葬元光復渡河三年卒卒之頃整衣冠疆起咄嗟曰發志氣遂瞑教人必以小學爲根基曰人之始生眞醇未離先入者爲主終身由之而不能去歐陽子謂顏狀未離於嬰孩高談已及於性命未可也語子經曰士不能忍窮一事不能立染指垂涎之氣不除負鼎滔天之心常在能堅忍決若長河而不回屹若泰山而不移然後爲大丈夫晚年遂性理學手書西銘界子經曰是入德之幾造道之階也門人苟宗道等曰先生不苟祿仕困而不

撓臨終而猶以志氣爲言不亦卓乎諡曰靜直未嘗祿仕可稱處士子三經彝庸

阮郝經字伯常世爲陵川人天挺孫父思溫生三子長即經幼父母挈避亂河南衆數百皆匿窟室敵索知薰穴而死者殆盡母許因咽塞而絕經甫九歲匍伏得黃齏一瓶又得密一器用母所佩剪扶齒以密和齏汁飲之頃而蘇旣長父欲理家事紆目前急母以其志氣不凡且郝氏世業儒令經力學於是朝執薪水之役晝營幹家計暇即讀書不輟張仲安識之聚童子俾教學刻苦肆意者五年遇疑難期必得常自誦曰不學無用學不讀非聖書父命名經蓋以專學望之故慨然以興復斯文道濟

天下爲己任元帥賈辟公授經有書萬卷蔡國張萬戶館之亦有書萬卷得恣博覽元遺山見之曰吾子狀類先生才識間出有所積而然也江漢趙先生曰江左學如伯常者多視伯常挺然一氣立於天地之間蓋亦蘇矣元世祖在藩邸召之不起復召至見於沙陀告以二帝三王之道上立國規模二十條有一國規模天下規模萬世規模會大舉伐宋經乃具奏以爲古之一天下者必已之德澤深厚紀綱完具彼之荒淫亂虐敗亡有豐天命人歸一舉而取之今地醜德齊驕肆妄動輕則見沮而還重則覆亡之不暇我國家開創以來彎弓躍馬窮征遠討四十餘年紀綱未立民不聊生彼之君臣輯睦政事修明無豐可

乘我乃空國而來僥倖一舉諸侯窺伺於內小民彫弊於下人之攻我者不啻數十百道而不備乃利人久備之道而攻之臣見其危矣退而著書義名之曰七道凡七千餘言頃命副楊惟忠爲江淮宣撫使楊以私故欲還汴梁經爭不可楊怒經竟建旆而南楊懼即俱會大師於江上後全師綴於一寨死傷甚衆急奏按兵明年即位開平召使宋或勸稱疾經曰吾學道三十年無益於世今天下困弊已極幸而天誘其衷有意息兵解兩國之鬪活億萬生靈吾學爲有用矣遂赴召以爲翰林學士佩虎符充國信大使告登位布通好弭兵息民意請與二三蒙古偕行不許曰只汝等往彼彼君臣皆書生也且賈似道在鄂時

已請和於我矣行省李璫實不喜和先達知宋乃止經經以璫言聞而行既邊帥仍侵略宋境經責以不遵約束至徽州館於軍營謂李松壽一再犯邊故且留儀徵又出李廷芝書云信使以美意而來松壽乃懷奸以逞殆類款兵誤國械李璫敗將爲左驗時平璋王文統忌經本欲擠之外出宋亦不遺牒三省又致書似道上宋主闕下辨戰和利害前後凡數十萬言抑之不報經曰吾惟有忍死以待守節不屈耳宋亦不加害反敬之厚其廩餼著書吟詠自若至元十二年問以執行人之故始禮而歸凡十六年明年疾革書天風海濤四字而卒年五十有三初圍鄂以國喪而解似道冒却敵功拜相後秉政諱其事以故久

留經使不得見經歸而似道誅又明年宋亡其在徵時有繫雁帛書事歸後始獲雁於他所曰金明池神之也所著有續後漢書奪魏而與漢黜奸雄之僭僞續一代之正統又以春秋聖人用道之書作章句音義及制作本意比類目共若干卷使讀者得聖人之旨趣又作三傳折衷凡四書總名之春秋外傳合十餘萬言以易諸家傳注議論不一著周易外傳十卷又爲太極演原古錄通鑑書法玉衡真觀刪注三子一王雅行人志各數十卷合十餘萬言經拘留宋中不與世接反得究竟著述子一采麟集賢學士朝請大夫歿後贈榮祿大夫司徒柱國追封冀國公謚文忠崇祀鄉賢詳元史本傳

郝彝靜直君仲子經弟也經明行修仍守高曾學而不仕之義正如東軒老人無復世味者

郝庸穎州知州經季弟於兄經使宋之二年請介行人以問罪遣之宋不納後十年又請會議不可明年又請不得已復遣之至建康而還幾死者凡十數其師劉因曰事雖無成亦可與有爲者

李平廷實祖制行修潔金時應詞賦未第就稅課使推輝州酒務使後避亂河南挺身諸李牙山麾下議論出人意表遂推爲帥府經略藉以援活者數十人元紀混一乃歸里鄉園戊戌選試儒人用賦論中選常訓子孫云修身莫如學問治生莫如業農

以孫廷實積官贈亞中大夫追封隴西郡侯長子義即廷實父舉孝子次和善書法吏事次欽順德府教授事見廷實神道碑趙安正鄉舉明五經

王好古由學正累官河中府判明五經于毛詩尙書尤得要領通蒙古文字

李義平子子廷實碑記云至元十年就試於博明經中選大德中以廷實調單州教職因家於單父義一生樂易康泰不奪於俗幼失母繼母龐鞠義如己出義孝龐如所生龐有疾醫不效義稽顙比辰願以身代繼乃剖肌肉一片和藥以進跪告龐曰兒別得善藥飲之即愈已而果愈人問何藥不以告久之人見其

脇左有刀傷痕始驚悟其事詔旌表後以子廷實貴贈嘉議大夫禮部尙書隴西郡侯祀鄉賢

和居正性敏學博友兄弟篤朋游潛德弗耀以高年耆碩旌表其閭

魏夢臣前志祇存郝文忠送行一詩今摘藝文傳疑

蘇叔華尙書萬初叔父遯野有詩名

李廷賓皇統中進士爲單州教職因家於單父後以順德教授人椽選國子助教翰林院奉修撰知制誥歷國子監丞拜監察御史尋爲國子司業階朝請大夫適缺祭酒不得辭哀二親在淺土力未能葬以中憲大夫出貳濟南去單爲近葬二親於單焉

陵川縣志

卷九

士女錄

十八

後仕至禮部尙書致仕

申如魯進士江西廬州府推官著春秋五霸說行世

婁裕官承郎河中府通判有詩集

明和元德以文行稱趙晉間嘗被薦入朝以疾辭結廬太行之巔題曰默齋宋憲濂爲作銘載藝文

李鳳唐順中十五子福王綰之後其高祖順封陵川男曾祖思溫靈州知州祖約贈御史父川賓懷慶推官鳳在永樂中以明經任順天府通判生平質直不爲崖岸與人交必誠必信居家以詩書爲世焉見邑人張瓚碑記

和維景泰辛未進士和爲陵川著族代多名賢維文學冠世天順

中遷浙江提刑以外臺去西湖不半里時與僚友登高望遠日接湖光山色緬古興懷因重刻楊鐵崖西湖竹枝詞其序謂使騷人墨客游於湖上者酒酣扣舷對兩峯歌此曲神交前賢於烟波浩渺間子璋成化中亦成進士

張瓚天順庚辰進士堅苦力學與同時薛文清瑄王家幸一夔砥行立名卓毅不拔由戶部主事出知臨洮府剛直寬和滿任去民留其履官至陝西行太僕寺卿多所著述從祀鄉賢子信舉人判岳州有廉能名卒於官

王曷成化丁酉科經魁任河南府通判所著有嵩洛稿

徐澍成化中鄉貢承張太僕瓚之學與瓚子信同以通經學古名

陵川縣志

卷九 士女錄

十九

於時

王道宏治中舉人知陝西朝邑縣正德戊寅太陽諸里民田千頃淪於河無已請折糧以布又縣當要衝不置驛民疲於奔命且與蒲華等偏枯爲累特甚請得郃陽登城協助民稍蘇屢雪民冤境內麥秀有三四岐者民有瑞麥歌後遷判河南著有六泉集

武思明宏治壬戌進士知江南金壇縣廉明公正好士愛民性情淡泊蒞任未期奸吏遁跡民稱神君崇祀金壇名宦居鄉篤於慕古雅有志操推誠立教門多聞人從祀鄉賢

武思孝官宗人府亞中大夫宣寧王府儀賓著有少原集

和景曾以孝友上聞應詔官蜀府典寶玉器重之命圖其像親贊於上

徐河貢生義士鉞之子循循禮讓爲時碩彥父歿哀毀幾絕旣葬廬墓三年事聞旌表

徐漢河之從弟父服賈外出歿於揚州漢徒步扶柩歸葬廬墓側有蒼狼馴擾之異事聞旌表誥封亞中大夫

李璠義重鄉評立家塾訓子弟孝友和睦自曾祖約祖景隆及父盛子珂孫鐘六世同居事聞旌表

徐滔自高祖貴以下曾祖伋祖璣父鉞及姪樑孫輝七世同居食飲同案誦讀同堂而徐鑛徐河徐漢等咸廬墓輸粟敦孝義者

陵川縣志

卷九 士女錄

累世不絕先後上聞累旌義門徐氏

徐休滔子任慶府典寶有詩集

武儀歲貢生任內邱王府教授封登仕郎有詩集

趙思義行誼著聞鄉國尊禮縣令特舉爲公直每朔望詢以民間疾苦政治得失思義之義洵可傳焉

牛耕平城鎮人正德六年流賊陳卿率衆突入太行至鎮執耕問

曰陵川與壺關孰遠近耕給曰壺關近且平陵川遠且險至壺關界詢衆尙遠賊以誑已遂刃耕之西火鎮兩邑胥免難

都永思嘉靖乙酉舉人知河南新鄉縣縣事著有壬子集

武錡嘉靖乙卯舉人初任伊陽令仿程純公遺意建學齋一百三

十六間大小器具悉備以處士立社學五刊養正編訓之置義田二百畝公用千金取百婚而足自奉極儉疏永昌渠六道以溉民田建倉貯穀萬石備荒政開廢業招流亡凡七百餘戶公清心寡欲凡審案民皆願就伊陽理移尹江寧有異績會一庫吏役滿盜庫錢事發當事欲周內之因矢於神次日當事者暴仆得雪遂掛冠歸大府咸贈歸裝民立祠者六並爲著德政錄叙其美文翔鳳名宦祠語云毀淫祠爲驂館捐贖錢爲講舍召杜之名不朽父老之眉尚返曾民間有血食而鬻序弗載主允隆俎豆以光蘋繁所著有尙書各篇經書撮要四書小補及西崖等集

王充耘道子不樂仕進構知止菴終身隱處其中賦詩見志縣令知之表其門

王充耕充耘弟選貢任棗陽縣令有詩集

李顥邦麟子初爲諸生抱奇負異不樂仕進孝弟力田以終其身婁繼志幼習舉子業不遇遂不出敦宗陸族優游以自適其趣大府魏高其節以居鄉有道稱之

馮奇遇邑諸生入試不偶力穡事以自給隱居蘇村與諸名輩日適觴詠人號爲山中祭酒

李時芳顥子世家華胄奉讀父書敦倫守道不務聲華沁水尙書孫居相授精節之例探貞曜之評私謚曰貞靖文子

馮時亨嘉靖丙午舉人居家孝友初通判濟南府清馬政修漕河有守有爲卓有可紀擢陝西金州知州政修民和時有巨寇何勉嘯聚不軌官軍勦捕亨特任紀錄兼給軍餉寇成擒其贖畫居多有德政錄從鄉賢

劉可孝廩貢生文爲世則行重鄉評裁成多士以教授終老子宗顏任白河知縣

劉鎮威邑貢生雖處困厄而悉力學不以事物經心卓居衆材之上教淑鄉井以義行率諸生孝子王國材孝廉韓國賓出其門王孝清修砥礪其子長國熙萬泉訓導次國勳萬歷中鄉貢和應光元化祖事母以純孝稱居鄉以謙謹稱

陵川縣志

卷九

士女錄

二十二

徐棹深於性學博通經傳倡教京國大河以北咸師事之諸復其家

婁西貢生事母極孝母常寢疾晝夜不離雖隆冬盛夏無少閒及母歿哀毀逾禮水漿不入口者三日旣葬廬墓

韓國賓萬歷癸卯舉人著有鳴野集

李萃秀萬歷壬子舉人已未進士副榜用賓七世孫邦麒之曾孫與兄培秀同以文行著嘗立軍田五十畝佐理閭及族人婚喪事精於史學方太史拱乾陳太史于鼎目其文云眞所謂胸中有萬卷書筆下無半點塵者結淡寧社與伯兄培秀課子弟杜詩杜言等於中講學論文一時名輩如和元化趙一心韓萬物

王圻王有慶協慶武立統王廷誨皆出其門著有醉笑軒集
劉宗顏萬歷二十二年選貢任漢中白河縣知縣可孝子也學有
原本性復剛介不諧於時俗不逾年歸休而家擔石在官之清
節可知子若孫一經嗣守蔚爲詩書之族

李世芳邑增生品端學優爲族黨所推善大篆工說毛詩邑生請
業者履滿戶外

徐應奎棹之孫瀟灑任達寄情詩酒作百字歌以自況著有清居
薄採等集傳世子騰雲騰宵

李大芳顓之子邑諸生直亮好義有妹適宋早寡而貧與兄時芳
等共割地二十畝膳養五十年俾全節以終其身

陵川縣志

卷九 士女錄

二十三

徐之中授訓導遠於世好篤於學行邦國皆推重之三舉鄉賓

徐教邑增生授儒官養氣父孝弟陸嫻好施慕義不求仕進棲志

林泉

曹懋德由貢授訓導以師道自任開門授徒置義田贍族人爲閭
黨楷則

曹之珩授訓導撫幼弟成父志行誼端淑累舉大賓

徐騰雲貢生應奎子事繼母孝人以爲小閔子有司以孝聞涕泣
辭邑令至每式閭焉事親竭力奉甘旨文太青內翰謂其事繼
母如生母撫從弟如親弟尤人所難私謚孝文先生所著有千
聖心法尙書珍鈔及語錄等書學者相與稱徐先生晚年舉二

子逢泰還泰

徐騰霄邑諸生居家孝友爲庠序典型高節懿行右古人風規
李桂香世芳子邑諸生恂恂恭謹守讀父書家無斗筲晏如也化
導鄉閭樂天知命澹然榮利

徐啓昌能詩工書法胸次磊落廻然出塵授訓導

武陳策通性理熟史學至誠純厚文行兩高授署丞

徐任重儒官善楷書尤工擘窠大字刻有碑版傳世

李大良鄉貢生樂道居貧教授鄉里士出其門者甚衆

和暖世家子不事羣屐風流而浸淫於卷軸負才終於貢子元化
爲名進士

陵川縣志

卷九 士女錄

二十四

牛麟趾鄉貢生專經學精傳注纂輯經書粹言以授諸生子星顯
亦以學行名

王廷誨讀書慕道俊邁逸羣孤韻獨絕其品槩見梅花閣

牛健考授外郎性秉孝義輸粟賑荒敦倫盡禮鄉里敬尊

李爭榮邑廩生稟行孝友鄉黨無間然且以淹雅稱著有常惺惺
及功過錄諸集

李杜詩見和元化序碎錄爲杜言兄而秦之鏹序媿魚草則云杜
詩者達道而窮者也窮如遇未必窮於言達於道不失爲公輔
又云杜詩磊砢多才慷慨類燕趙氏而不著姓名按和氏序其
爲杜言可知因摘其語列於杜言前

李杜言秉父兄訓而達以天才雄邁絕俗風流人豪著有鳴情碎錄以所作古詩歌填詞樂府隨筆隨錄和元化爲之序而傳之路中行貢生勤學篤行其精敏誠切之實著而人多效之見堠山碑

婁鏗邑增生明試諸生屢見賞識而終阨於遇白首窮經精神益振

傅天錫銳志學業不屑屑於經生家言號稱博雅君子見松窻痴軼序

秦廷璧與路中行輦同受業於孝文光生之門不隨世爲戚戚獨行君子也

陵川縣志

卷九 士女錄

二十五

婁凌雲邑諸生西之從子父疾衣不解帶湯藥必親嘗累數月不懈及歿凡附身附棺者一秉家禮既葬廬墓三年

婁銓凌雲孫父抱疾彌年扶侍無怠父病隆冬思瓜時大雪不易得銓冒雪重走百里覓瓜以進父歿哀毀骨立家貧奉母必極甘旨不以不足缺供有司屢加旌獎

曹民信邑諸生幼喪母痛哭垂絕不飲食欲從以死父歿哀戚逾常十餘年骨見衣表事繼母晨昏定省不異所生事聞旌表清崇祀鄉賢

朱廷彥貢生節婦徐氏子生夫父而長就學於舅氏能承母志勸學不輟母老竭力奉甘旨以終天年宗族稱孝與母節同旌

徐居仁諸生菽水養親必誠必敬凡昏定晨省冬溫夏清之節一以誠行之公舉得旌

王佐才邑學生學使者以孝行表其鄉

王國才鄉貢生事繼母奉長兄敦族誼鄉隣推其溫厚豈弟君子也

武立綱邑學生事祖父母克敦孝行見重鄉黨訓弟若姪率爲成材

王一欽邑學生七歲母歿繼母張虐遇之父以不賢責張欽泣諫及父故張病嘗藥祈代孝謹益甚異母弟一欽感之勸張以恩待而張竟爲慈人稱爲小閔子

陵川縣志

卷九 士女錄

二十六

李培秀崇正年貢生積學種文學使者延主河汾書院癸酉流賊逼城王觀察肇生詢謀略縣令王乃以培秀薦委以城守加城垣高五尺賊渡河去城卒全事可篤孝年八十疾封肉以進隱而弗彰逆氣未殄遂岩居不出自號孤山處士著孤山問叢集董時增千總崇正五年流賊逼境巡道王肇生來授幾不免增以身捍之殺數賊而死

靳朝鮮千總崇正五年山賊竊發朝鮮與之戰死之

段章美邑諸生教授毓秀子崇正五年流寇逼掠被執章美大罵不屈遂遇害

路如瀛崇正元年貢初任沂州同知後補臨清州同知署本州事

十五年閏十一月賊破城殉難

武柱國邑武生崇正三年河曲賊老猗猗由汾州平陽曼延至邑之奪火鎮以爲巢穴時冀南道王肇生厲志殲賊幕壯士爲前鋒柱國與邑人董時增靳朝鮮往應募靳與董先後陣亡柱國瘡痍之餘任前鋒領兵殺賊賊平授冀南道千總十七年蔡巡撫懋德名勇幹才邑令朱奉鑑以柱國應蔡異其局幹奇偉因念平猗功賜以額曰壯志請纓以勵之即命下潞澤督餉奉檄出未幾省城陷蔡殉難柱國號哭數日亦卒

清曹邦偉以恩貢授江西定南縣令噢咻疾苦宏獎風流士民咸愛載之會金聲桓發難捍守孤城力竭城陷不屈以死長子翰

陵川縣志

卷九 士女錄

二十七

明次子際盛從子翊明僕伏新等十一人俱從死事聞誥贈江西按察司簽事子祭塋廕一子入監從祀鄉賢

和元化順治丙戌聯捷維璋之裔孫鄉貢援之子任新鄭縣令有惠政卒於官百姓立廟祀之治行文章卓然於時惜早歿未竟其緒

秦之鉉字鼎黃弱冠以能文名風流倜儻功於詞賦順治丙戌聯捷初任陝西莊良縣丁艱起補江西新建縣自武金壇後邑中甲第寥寥自之鉉與和元化聯鑣而起歷任所至政聲遠聞崇祀新建名宦有閭素草汾水秋滕王閣詩等集行世

趙一心順治己丑進士鄉會皆亞魁任長山縣令高才絕學治績

尤著清勤前志云懷范滂之大志類屈原之孤憤抑鬱憂思遂歿于官著有北征草

楊一藻字煥章廩生姜逆發難破城藻慷慨與邑侯李向禹同時犯難知縣黃國燦按臺高一請于朝旌其門曰爭光日月從祀忠孝祠

秦克俊貢生知南豐縣死金聲桓之難而恤典未及人咸惜之從祀忠孝祠

徐還秦邑貢生孝文先生員嶠次子員嶠峻潔誠篤還秦殊有父風學博才贍以諸生老有詩名

李汝憑字虎臣中式康熙丙辰科武進士任廣西柳州府提標都

陵川縣志

卷九 士女錄

二十八

司固守龍城邊陲賴以寧謐因力疾勦則卒於塗督府親爲致祭贈明威將軍品概峻整有儒將風

楊翔鳳以吏員於康熙十七年授貴州揚老驛驛丞時滇黔之氛未消八閩騷動驛當荆南要衝羽檄分馳夫仆馬斃又軍需屢匱幾難措手平越官吏多委印去翔鳳獨誓死勤事是時大府揚因事過驛見其難爲之增馬二十疋事平補平越訓導官兼署縣令事越九年轉邢台尉

劉奇聲歲貢生白河令宗顏季子白河致仕歸官橐蕭然奇聲甫九齡父歿居喪即如成人及長雖困銳志於學博通經傳尤長於書教授鄉里諸生多有以文名者數舉鄉飲大賓經修邑志

有司旌其門

寧景俞邑貢生才氣高華號稱博洽喜聚書伏而誦之與弟珽相師友一室今諷藹如春融工楷法爲士林模則

武靖遠諸生廉介尙義邑侯孫移學宮靖遠捐修茶亭二座孫區其門曰功高聖域邑侯黃重其品嘗極稱曰耿介拔俗壁立千仞所著有孝弟家訓遵耕讀訓說及唱和詩集

牛魁斗邑諸生幼孤奉母孝家貧無所得師恒以母紡車分光授讀武諸生高等母輒輾然斗亦承顏色喜然輒慘戚傷父不及見也及流寇壓境劫其母魁斗哭請甚哀賊曰此牛孝子也遂舍之將貢而卒從祀忠孝祠

陵川縣志

卷九 士女錄

二十九

和方元化次子性孝友遭兵燹後淡于世榮躬耕奉母遯老窮山武毅邑諸生年十四喪父上無伯叔弱弟僅數歲惇惇母子相依爲命時復兵戈亂離有父遺田數畝距縣百里毅徒步負米養母後母子避兵東河數涉艱險嘗負米夜行荒山遇虎不爲害水驟至亦不溺縣令平重其行舉介賓胡令題其遺像曰處貧無怨臨難不驚克敦孝友天祐其行岸然道貌千載如生

任增建少失怙己丑負母避亂山中途遇兵以身蔽母跪泣求曰寧殺我母驚我母兵義而釋之旣而母因驚成疾建事母病凡巾帟厠牖親自浣滌數載如一日建年九十餘鄉黨稱孝焉

閻實興縣訓導仲瞭父七歲喪父弟方三歲能撫愛之事生母李

服勤順則儼如成人就外傅讀書至孝親旬即知向館師求解師逆知其天性孝友迨十七母病在床實侍湯藥三年未嘗頃刻離既歿哀毀逾禮至七十歲無一日間可謂終身猶孺子慕者

姚文炳康熙丙寅拔貢廷試補教習需次縣令天性純孝入成均念父母不置恐親罹疾病恒寄藥物聞母病即馳歸及母病不起哀毀骨立廬于墓側朝夕哭卒侵風霜以死

劉惺邑增生奇聲仲子總角補博士弟子員孝友端謹不墜淵源尤善書邑生徐佐目之曰性天猶閔子書法如魯公

和姬化邑廩生少孤依母習讀忠厚忍讓人咸誦之曾遭劫掠恐

盜抵法竟寢其事

馬掄奇邑廩生孝親友弟鄉黨推重舉鄉飲介賓邑令平表其門曰多士儀型

武忙靖遠子增廣生素性純飭品概端良孝繼母友兄弟爲文不趨時好晚年始入邑庠學者咸尊其品誼

寧珽歲貢生孝友性成奉母李備盡色養母患痢珽寢處不離躬滌廁膾及歿哀毀幾殆水漿不入口者五日絞衾殮具一遵朱子家禮終身好學晚年不忘諸生就而折衷焉

劉堯封廩生才逸學博品卓行高篤于孝友不屑屑世俗事常注藥拯人疾苦所著有學庸疎未竟而卒

徐晴歲貢生任祁縣訓導能竭力事父母父病親嘗湯藥及歿水漿不入口者三日寢苦枕塊百日不食醯醬期年食粗糲泣血三年未嘗見齒母歿盡哀盡禮一如之春秋享祀儼如生存宗黨有秉禮之目

武雅廩生年十歲父歿啼號淚竭喪面失血者十年遵祖訓順母心學業成就不負先志祖父母歿相繼承重不入內不飲酒食肉者六年母歿哀痛不欲生痛母苦節四十年渴蹶請旌載在郡乘

徐慧龍歲貢生生而純孝先意承志親疾親滌溺器扶持終始不怠

陵川縣志

卷九 士女錄

三十一

閻仲暉實子任興縣廣文器度圖厚性慤行方年八十外猶盎然春和如少時道充德粹人也有子亦能承家學

劉謙廩生制行正直性嗜古不隨俗爲進退父早歿春秋展墓每涕泗交集治祖母喪禮父志無弗中禮

都俞邑諸生文行爲庠序所推康熙三十一年邑令王舉鄉飲介賓

李煥邑諸生篤孝弟敦嫻睦性恂謹居隣縣治口不言戶外叔無子煥奉養如父又其姪少孤撫育如兒體恤族黨解推鄉鄰倡修郝文忠棣華堂祠舉介賓人以爲不愧云

李旭桂香孫邑廩生淵涵經史行文必窮理境意在羽經翼傳不

苟投世好屢蹈省門無識之者性端確不與物忤朋游推爲老宿

牛冲漢廩生至性成親病衣不解帶湯藥必親嘗及歿喪葬一如禮制

王元郇諸生事親孝執親喪盡禮廬墓三年生平言行不苟惜早歿國人哀之

劉文岐邑令王舉耆賓當明季末年流賊入境文岐與其兄向岐負老父母子深山中採野物以養親數十日父母藉以無恙事平歸里人咸異之孫世筵邑諸生

劉忱邑廩生奇聲季子奉二親以孝撫兩姪以慈家徒壁立讀書

陵川縣志

卷九 士女錄

三十二

不輟六經子史靡弗貫治性不慕浮榮不爲科舉之學蕭然世外

姚之鼎八歲喪母十四喪父稚年孤弱而立志承先敦宗誼篤友愛事事悉體父志子諸生瑁列其事

王如旦邑增生性至孝竭力事親飲食寒煖纖悉不遺時舉家染病一月中父母繼亡如旦病中匍匐親旁凡附身附棺一一如禮學問優長教授多所成就

和添壽增廣生家貧篤學習舉業而不應試教授生徒忘懷得失居喪不飲酒食肉者三年

楊鳳翽七歲父歿孝事二母凡養生送死悉如禮制年荒焚券鄉

里感之考授經歷

馮沅善事繼母七歲母歿繼母韓撫之韓病彌年食飲動作沅必親奉扶持一夜屢起者凡三十載無間寒暑生平足不出里門口不言是非終日默坐彈琴自娛享年八十餘卒

趙藩吏員考授經歷事母以孝稱事庶母以敬謹稱撫幼弟成立內外重其孝友又獨輸百金修家廟爲歷久祀享計藩之篤本根藩之孝友也

焦時兩十二喪母十三喪繼母十七事繼母邱與其父能盡心力家貧無以爲生走河南負米以養之邑令蔣謂其孝行堪爲一鄉表率舉鄉長留七年

陵川縣志

卷九 士女錄

三十三

武元勳考授經歷弟六人皆撫之至成立葺先祠修祖墓諸事悉竭力倡始

楊顯秀氣量軒豁不阿世取容與次子諸生培演感應篇中事成帙用以勵俗邑令平嘉其行錫之以冠

徐鍾靈舉鄉約秉公勤事鄉里服其平直邑令韓舉爲鄉飲耆賓旌其門曰義公鄉望一曰惟德動天

秦夏生平篤孝義孀母路早寡夏奉養不倦一子夏撫育之又爲族弟完婚配隣人趙權質美未學夏恐其貧而廢書招來家塾給以膏火權後得入縣庠其成人之美如此

武愿考授經歷好義樂施篤於宗族有族人慶慙懷惠葬親授室

皆傾囊助之且立書室積書籍備館穀敦禮先生訓迪本族弟姪輩武氏一門書香相樂不絕皆愿之力居多

馮君鎬篤於友愛兄歿撫二姪成立並以遺產讓之

武阡邑諸生爲童子不好嬉戲讀九經皆手自抄撮旁及聲韻之學父病親嘗湯藥衣不解帶者逾月歿後三日水漿不入口寢處苦塊致傷肩肘間及許漸潰成瘡性嗜書聞所未見雖典質必購讀乃已環堵蕭然咏歌不輟年七十猶註解批點史記嘗曰儒者立志當以古今第一流人自期學者諡文孝先生所著有遺斑集

王繹增生幼承庭訓服勞不倦父疾親嘗湯藥失怙後事母氏承

陵川縣志

卷九 士女錄

三十四

顏順志孺慕之誠終身如一兄弟式好無尤教授生徒殷勤誘掖值歲荒出粟周急鄉黨德之

韓方昭增廣生鄉飲介賓品行文章士林推重學憲曹區其門曰品高士序

秦夢麟鄉飲介賓事繼母如事所生推誠立教里中有貧子弟不能就學者咸資給之使卒業邑令陳區曰士行克修施區曰文壇宿望

王德峻鄉飲耆賓居喪悉遵禮制待同祖兄弟如胞先業所遺悉以推讓比昆季相繼凋謝無遺孤贍孀婦無不盡心力爲之居鄉爲人排難解紛有以急告者雖自顧屢空必輾轉籌畫以應

次子希曾中庚辰科舉人

武彭齡歲貢生恂恂好讀書教授生徒數十年娓娓不倦論立品則曰當思不朽二字論處世則曰須明吃虧二字論讀書則曰當體吃苦二字恒以古之學者勗人博聞多識于邑之文獻留心授輯衰集成帙修志乘方欲採取巧据惜遺失無存矣

郎彪兄弟六人父在時兄弟等欲析居彪亟勸孟未允彪謀于仲兄欲服賈獨力養親不願受產伯兄悟仍同居如故鄉黨中稱其孝友

魏振卿鄉飲耆賓年十九父母歿廬墓三年咸推至孝性成

張玉龍拔貢生善讀書能文章教生徒多所成就任芮城縣訓導

陵川縣志

卷九 士女錄

三十五

見人士頹靡殷勤訓詢加意鼓舞不數年人才蒸起文風不變焉

趙克敬庠生與從兄同居五十年未嘗忤兄意見兄病親調藥劑不離枕席兄歿待從姪與子姪爲一體四世同居不言分析設義館延師聚村人俊秀肄業其中先後入泮者幾四十人

姚彭家赤貧擔負爲業事寡母盡孝兄歿時遺孤甫三歲彭教養有方嘗向母泣曰吾子有失尙可有子吾姪有失宗嗣誰繼歷三十載卒能教姪成立邑令陳給匾嘉獎擬之鄧伯道

段德麟字玉書溫和敦厚生平不苟訾笑聞議人過輒掩耳避之邑有侯姓者曾爲其子聘婦於某氏後某欲敗盟知其貧故厚

索聘金於侯侯窘無所爲計公聞即傾囊贈之卒完其婚其好義樂施類如此

馬班邑庠生事親孝教子勤立品端方鄉閭表式子司教庠生克敦士行父子俱公舉介賓

武敦字厚甫經明行修學有根底乾隆癸酉舉於鄉家世積善敦尤急公墓義婚葬凶荒多所俟助於邑中公事竭力倡始寺觀壇廟每興大工慷慨樂施素行爲人推服

秦懋效字松嵐乾隆丁酉拔貢官直隸深州州判工詩尤長五言清微淡達直登沈宋之堂而入王孟之室統名燕南趙北詩草爲陵川六詩人之冠

陵川縣志

卷九 士女錄

三十六

武維藩字价堂高才絕學博通古今性豪爽日下交游冠蓋相望以選拔入闈主司得卷擊節歎賞已列亞元因未場經藝誤印題紙臨榜被黜事發奏聞補入科場條例嗣挑取謄錄充武英殿校對候選教諭歷任孟縣夏縣勤於課士刊吳信辰四書題詩以啟牖後學告歸後請以丁歸地糧免田民之累卜築別墅號小南庄日課子孫楷法馳名四外求書者戶外屨滿老而不倦著四書聲韻詳註已梓子風彩鳳三以名諸生貢成均

王伯儀號雪農拔貢生文才高瞻尤工詩賦析成王楓船侍御泊水竇斧塘太史俱出其門一時宗工推爲風雅正宗從康伊山學使遊幕關中卒於渭南

和友邦號曉園潛心力學讀書外無他嗜詩文清微古淡瓣香於
王孟韋柳諸家晚年境益困難雖厨中無詠米吟自適入棘闈
十餘次薦而未售以歲貢候選蒲縣訓導終於官

王琚字崑圃貢生好爲古文力追韓柳歐蘇諸大家工詩與楊雲
亭齊名一時有王楊之號

傅弼字築巖貢生幼負才名作爲文賦皆奇恣博麗爲名醫懷西
先詰嗣故尤精岐黃寓晉陽時撫軍藩臬皆延爲上客以青主
後身著滋雨山房集散佚罕存

楊灝字雲亭貢生有詩名爲邑六詩人之一

曹旌忠定南公裔孫少有膽識遇事敢爲嘉慶間詔恤定南公後

陵川縣志

卷九 士女錄

三十七

始勅世襲族人無敢應旌忠獨赴京引見遂承襲恩騎尉累世
罔替以千總歸營試用委署本邑城守營弁人僉榮之

楊煥豫成父教讀終身曾館高平祁宮保家博極羣書篤志功名
踏并門秋風十二度屢薦不售以明經終

武威遠字安亭歲貢敦品砥行以嚴正爲閭里所彈嘉慶癸酉豫
匪入界邑令議守城威遠毅然曰守城不如守山山在則城無
庸守山失則守城無異况五百八十三庄生靈甚衆是彈丸者
即令能守其所全幾何也卒從其議遏賊西竄之路城賴以完
又邑中地糧向係以釐爲分民受其累商於邑侯力詳 上憲
卒革其弊其強毅有爲類如此

楊燧號曉園增貢生型家有法善處兄弟之間爲閭里矜式其卒也高邑祁恭恪公爲誌其墓子觀曜官至四川觀察使

寧衛卿字愚亭性溫和而學純篤有聲文壇劉公紹先登賢書求示闡稿一見輒喜曰我知所以得之矣次科庚申恩榜果舉於鄉居恒樂敦善行修社義倉捐鄉會費僉爲倡勸晚習岐黃以經人

楊乾初字葆元少承家學風流跌宕善屬武嘉慶戊辰中式丁丑大挑分發福建初署寧洋縣事詢民疾苦讞獄虛公詳慎設循環簿按月申達上憲喜其平允檄各州郡視以爲式勸興學校刻作詩法寧士習聲病者始多旋題補邵武其課士如在寧尤

爲添設膏火體恤寒峻兩次調簾分得元所取多名下士人服其賞鑑在邵去串都之害興聯甲之法東北有天羅礮者俗號小臺灣棍匪相依爲奸殲厥渠魁積弊爲之一清又於城北河口募修義渡戒水手之需索行李往來口碑載道甲午歲霖雨四旬籌米平糶慮滋事者煽貧民爲亂憂懼未幾卒於官刊本邑六詩人稿著就正詩文集卒以行世子長春官工部郎

張翥工篆書潛心學古嘉慶癸酉選拔陪貢旋中副事以母氏苦節竭蹶請旌於邑之公事躬親倡率好爲人排難解紛終身不

倦

劉儒鳳平城人博學能文尤精左氏春秋嘉慶戊寅舉於鄉任潞

安平順縣學數年告歸終於家

馮式邁三泉村歲貢以古學馳名律賦膾炙人口喜慶間應五台
召試屢冠羣英以數奇爵賞卒無得

都長壽號眉山副貢文壇夙望日課數十藝援筆立就出其門者
試輒高等采芹如拾芥善爲初學津梁著有敬業齋稿門人婁
仲選梓以問世

秦萬壽字恒山歲貢生教授閭里以嚴見憚嘗博考載籍輯郝文
忠公年譜附文集後

馬延年耄而好學媿媿不倦累踏并門薦而未售嘉慶丁卯賜副
榜戊辰賜舉人已已入京師賜國子監學正里人匾其門曰鴻

陵川縣志

卷九 士女錄

三十九

恩三錫

李薪池下村職員富而施道光間歲荒雜粟於糠量濟村衆全活
無算明春復出麥百餘石以施種生平積德至今戶頌焉

薛鳴皋字鶴亭品端學粹未冠登賢書旋成進士分司銓部熟悉
例義多所改定則例館册署爲總勘以銓選屢與上官抗辨守
正不阿二十餘載幾老部曹後因廷章交薦遷監察御史遇事
敢言絕苞苴有關節不到包老之風未幾告假歸捐二千金置
澤郡試館於京師返里修廣惠倉利賴甚衆主講邑書院以實
學勵諸生翁稱爲道學咸豐九年卒於家別有傳

王汝楫號松舟孝廉希曾次子有名士風流游京師以明經肄業

太學與竇斧塘太史王楓船侍御相頡頏報滿用學博候選歸家居櫛木山莊詩酒倡和座客常滿自號西溪老人著有西溪詩集婿楊觀察梓以問世

楊豫成字立之博綜經史性耽吟詠教授於邑之寶應寺者十載道光元年舉於鄉十上春官屢薦不第甲辰大挑分發江西署安義縣事值歲祲平糶緩征民感實惠旋題補龍南懸巡四鄉懸格捕盜獲名賊百餘縣境肅清奉檄分防通判觀音閣橫崗之勝禦擊粵匪有功以同知直隸州升用補寧都未及期年調署贛州府因粵匪洪秀泉道九江南康竄入腹地援兵登陣用印襲衣誓以死守籌餉設策大小三百餘戰未嘗少挫守贛六

年省城以外九郡相繼淪陷而贛城獨屹然無恙士民胥倚安圍旣解復勸捐砲船及倉穀六萬石論功用知府賞戴花翎壬戌去贛委署南安殘破之餘百廢俱舉積前後勞以道員留江補用甫去任將引年遽以疾卒贛人祀入名宦刊有享帚詩集問世子長達江西候補知縣

寧敬止歲貢生處世謙恭無少長每見輒揖學行見重於鄉閭楊觀隴字麗軒豁達不羈由廩貢生教諭河津六載得保舉知四川雙流縣修考棚以造土除幘匪以安民歷任六年先後拏獲首犯數十名紀大功升任階州旋署眉州因捐議叙知府加道銜兩次署永寧道正值軍務屢經戰陣勤勞不懈因公墜誤卒

於官子長庚現任四川縣丞

秦廷堅歲貢生篤志慕古性行嚴正不隨俗尙人稱古風

曹遐齡字宜亭歲貢生以文學起家督課甚嚴視功名爲性命教
仲子鴻舉卒進士孟季皆有聲庠序

王恩瀛號梅知伯儀次子父子選魁負時盛名工詩善賦天才放
逸爲黃學使所器重延主河朔書院爲人不修邊幅有狂士風
婁仲選一字萬青質樸寡言力行善事惜字紙印經文懸夜燈以
照人行施館穀以啓幼學生平慕小倉山之爲人自號景袁譽
重文衡楷法尤善卒以明經老著擬明史樂府二卷待梓

張永昭字小銘工詩文交多名士不以豪富自矜見義勇爲嘗爲

陵川縣志

卷九 士女錄

四十一

王又癡刊樹萱堂詩草

王臨池字墨溪恩貢生學有實行素履端方先世賈於豫父卒扶
櫬歸葬事祖母寡母均以孝聞家貧勵學不慕榮利自乙卯秋
闈報罷後遂絕意功名悉心訓誨一時文士多出其門其學自
經史外旁及諸家無不贍博晚年尤精岐黃術濟人甚衆及同
治丙寅己貢成均尋蒙 覃恩例改恩貢時年七十三歲與邑
中諸著英互相酬唱徜徉詩酒以終餘年著有墨花香村詩稿
待梓子二仲庶熙邑庠生先卒伯庶隰乙亥 恩科亞元

都九疇字瑞徵歲貢生事繼母以孝聞撫弱弟以友聞慕義好施
周恤族黨臨終囑子捐聖廟外地以廣宮牆事聞旌表建坊祀

忠義孝弟祠子賦三甲子解元

楊咸和字堯民敦本睦族型家有法選道光乙酉科陪貢居喪讀禮百日寢苦自閩南倦遊歸設藥以濟困窮延師以教戚族每遇公事卓然有爲如復社倉修文廟諸大役指不勝屈至治家尤有禮法迄今猶稱楊氏家規

曹鴻逵字翊廷進士鴻舉兄少年與弟齊名高才博學睥睨一時科歲試輒高等秋風十五度屢薦不售丁酉鄉闈中式覆置遂絕意進取以恩貢終

武鳳彩字五峯教諭維藩四子性行嚴正博學能文屢躋秋闈以明經老楷法蒼堅碑版照世卓有父風

陵川縣志

卷九 士女錄

四十二

曹鴻舉字秋皋博學高才溫雅可親由選貢中式京兆主潞城平順書院講席多所成就潞士區其堂曰經師人師丁未成進士殿試二甲楷法端嚴咸以館閣期許未酬厥志即用河南大吏僉欽其才學郭臬憲延爲子師聞望日盛以大用期之秋補授溫縣未之任遽卒鄉會墨鎔經鑄史俱膾炙人口著有印雪山房詩草待梓子振翰已卯恩貢生

韓懋德號厚菴天才敏捷少擅文譽道光甲午鄉試獲雋甲辰成進士即用浙江歷任青田分水縣事是秋調簾文占首房得士多名宿俞太史應方伯俱出其門派委運銅瀆南艱苦備歷差回改禮部精膳司主事告假在籍主本邑講席教人學文以熟

復光正大家爲宗平生天真爛漫和而不同晚年精堪與術卒於家

秦能復恩貢生孝友成性接人以和痛父積學無名請封追贈撫受弱弟盡以財產與之善處鄉里爲人排難解紛老而彌篤

曹鴻文字漢章性慷慨文風華弱冠後遊府庠食廩餼與伯兄鴻遠仲兄鴻舉頡頏一時有聲場屋邑侯劉子容獎予匾額擬以河東三鳳暇則與諸名士得詩酒之會高談雄辨四筵皆驚棘圍屢薦不售歲乙卯將貢成均時秋闈又報罷鬱鬱而卒士論惜之

楊長春號菊人工詩生平儉以律己勤以服官由廩貢拔例主事

陵川縣志

卷九 士女錄

四十三

戶部轉工部升虞衡司員郎三歷部曹均得政體以遜退稱於時告歸卒於家薛侍御有輓詩

韓子庚初名懋行進士懋德弟自幼慧悟經史過目成誦曾館高邑祁恭恪公家博覽古籍後遂兄遊宦南服自謂得江山之助文格益進尤好研究韜略剛強自任壬子中式副車未竟其志而卒

李應又孝廉載子以父任平陽訓導歿於官負體還鄉事旌表孝子

秦秉範字水村沈默好學耿介性生家貧傭書度日及有聲庠序豐於舌耕而自奉無異貧時惟事父甘旨需備極充裕選道光

己酉科拔貢就職直隸州州判時有友願助資勸仕出毅然以親老力辭鄉黨咸以孝稱邑有公事持正不阿十踏并門積學未逮嘗庭訓諸子曰人生讀書明理綱常倫紀無虧乃真學問非徒爲博取功名也其抱負之宏達可想見已得年五十卒著有硯荷廬詩文待梓

武心廣字寬人郡增生孝友性生執親之喪守制六載事兄無違同居和睦四十如一日授徒鄉里儉以養貧著春秋王侯謚號歌一卷四惜齋詩文二卷待梓

李苾號蓮溪性敏好學幼負才名戊午鄉舉辛未大挑一等用知縣分直隸北河候補以能幹著權篆雄縣未週月去任遽卒

陵川縣志

卷九 士女錄

四十四

都賦三字京堂彙甫其號也少負敏質未冠登庠序屢列優等同治甲子科以第一舉於鄉應禮闈薦未售隨以知縣註冊銓選由都歸里嘗語人曰與其覓官於朝不如退耕於野自號退耕野人遂無志仕進終老於家生平急公好義光緒戊寅歲大禘兼有豫匪患境賑防並舉出力爲優大富獎以學道愛人匾額邑學宮前照牆規模逼隘文氣不舒累年科名減色同治間慨然以己近照墻地三畝餘捐作廟塞籍資宏闊自是掇巍科名相繼不絕尤見稱於士林卒年古稀著有秋山書屋文稿睡餘隨筆詩草待梓

曹登瀛字仙洲學術純正謹言慎行事繼母以孝聞甲子舉於鄉

辛未成進士以知縣分發河南即用到省一載未任而卒
武培德字樹滋金武氏三狀元裔篤好經史過目不忘工屬文初
執筆時出言驚人幼肄業望洛書院即爰知於薛鶴亭侍御侍
御峻節高風於人少所許可獨於君稱忘年契後歷任 官師
無不刮目以視舌耕幾三十年列門下者皆一時俊彥七踏并
門中同治癸酉副車以直隸州州判注册銓選雖屬舉不第而
文日益精尤邃左氏學著有十二公時勢論峯芙山館課藝待
梓泊水寶千山觀察贈以詩云他日立 朝能鎮靜薛夫子後
獨君期是其爲人又不僅長於文詞已也庚辰歲邑宰李明府
延修縣志草創胥出其手未及歲事因疾遽卒惜哉子孔泗

陵川縣志

卷九 士女錄

四十五

邑庠生

秦忻字一農幼聰穎及長多智謀家貧好學不倦同治癸酉科拔
貢旋游京師考取八旗官學漢教習傳補正藍旗教習俸滿以
知縣選用未任而卒著有守硯堂詩文稿待梓

韓懋昭字勉明歲貢生進士懋德之季弟有品有學克儉克勤爲
文簡易構思最捷一題立成數藁試輒冠軍辛酉鄉闈以額滿
見遺自是遂無志功名惟以教育人材爲樂一時遊其門者稱
循循善誘云子之棹邑廩生

杜士俊黃庄村人性戇直家貧食力其父懷宏歿於河南廬氏縣
誓取父骸苦不知所行近廬邑過一山谷遇虎倉猝莫遊虎竟

不傷而去山上人異而問之士俊告以故愁容可憫中有姓李者名秀蹊愕然曰我與爾同鄉昔爲爾父夥爾父死即我爲殯今遇虎不傷孝所感也士俊大喜叩謝遂得父骨所在其人且爲謀曰爾父與莫某爲莫逆交某昔試京兆無資爾父曾助以百金後得官報之不受今以翰林在籍盍往投之彼念舊交必使爾父與櫬而返士俊曰吾來時一無所知今得君示殯所在已出望外何敢他求况父在不受彼報今我求之非父志也遂忍困負骸而歸欲合母葬而母厝於崖岸樞夥不辨無奈號泣三日一柩忽糝土崖磚裂審視之母碑在焉喜而合葬村人咸稱之爲杜孝子

李天成景聚次子家貧性孝同治間歲飢境尤迫雖有父兄貿易中州不暇內顧母又染疫疾晝夜呼泣天成仰屋長吁無所爲計因竊剗胸前肉烹調以進母病頓愈嗣因菽水無資一日向郊外野哭忽見空隙有物拾得古錢百餘銀少許持回奉養母賴以全

以上舊志

李長清重興鎮人清光緒間歲貢生與陳黼堂同里黼堂爲一時傑出遇有疑難猶就正於公晚年絕意功名優游林泉吟咏自適

張文明清光緒間邑庠廩生治南村人少從申逢楊學工舉業一時名輩如孝廉黼堂宋選魁捷庵張廣文蘭溪皆出其門貌清

奇爲人有崖岸無敢以非理干之者

馬佩衡字健菴延年之孫受業竇千山之門工舉于業書院月課恒冠同曹屢薦未售時論惜之

馮子雲字天衢張仰村人歲貢生世元之子光緒間歲貢佃儻長辨在西南鄉一帶極負聲望排難解紛西鄉詞訟爲之鮮少自先生歿後而獄訟繁矣

陳汝明字繡堂光緒己丑舉人歷任壺關崞縣教諭博學能文所著詩文散佚不存殊爲可惜

楊長達字尊三號春潺豫成長子雙目炯炯資稟高朗工詩善琴雅有深致清附貢生歷署江西長寧建昌龍南等縣勤政愛民

所至有聲著有眠琴山房詩集待梓長子舒另有傳仲子毅清宣統二三年間曾充山西諮議局議員改革後任和順縣宣講員工圍棋三子清庠生四子固皆穎悟早卒

都賡揚字舜卿解元賦三子孝友寬厚刻苦愛人長子桓另有傳曹登萊登瀛叔弟工舉業尤善騰書各寺廟遺跡甚夥鄉試屢薦且屢備中迄未得售人咸惜

楊長森字東坪豫成仲子清布政使司理問驅幹秀偉言語伉直好苦思工山水喜琴詩文楷法均超逸所作多散失惟萃原遊記待梓隨兄弟達官西江襄城政績歸鄉教子嚴厲曾整理文廟祭器提學使錫嘏獎以禮在警宗四字感地方瘠苦不時親

履畷畝勸農桑又不辭勞苦爲地方造白土坂松林一處卒年七十子六長謙山西大學肄業察哈爾財政廳稽核處主任次勉清己酉拔貢國民代表會議議員次厚陸軍大學畢業晉綏綏靖公署參謀處處長次愉又次聰劼

申凌雲子逢楊清同治間邑庠生城東三十里黃虎掌人善大楷當時東鄉一帶匾額對聯多出其手教授鄉里成就頗多

田心安字靜齋冶頭鎮人少孤事孀母段氏至孝及長以開採煤礦爲業有窰數處清光緒二三年間鄉人欠債者爲數甚鉅大祿後取券焚之家人問故曰罹茲浩劫貧者餓斃富者疫死吾家六口獲全是再生也豈可以再生之人而復討前生之債乎

陵川縣志

卷九 士女錄

四十八

若留斯券恐有不屑子孫追討前債致生糾葛其餘疎財仗義之事尙多

田金鎖心安之伯父家殷富衣食類貧人有嘲其自奉太薄者解之曰吾農人不飢不寒足矣豈敢奢華凡鄰里有婚喪事及貧寒子弟無力就學者多出資助之晚年得子人以爲積善之報都 桓字贊侯解元賦三之孫兄弟五人先生其長也敦厚謹慎

鄉望極孚光緒己丑中十二名副榜甲午中式三十一名舉人候選知縣好善樂施排難解紛訥言敏行以誠感人歷任本縣高小校長學務總董商會會長省議會議員子之耀歷任武鄉陽城高平區長本縣公安局經理現任商會會長

審 模字子立增貢生精通醫理清介自守愛兒收族時人以耿直稱之

段樹棠字芾林清邑庠生山西優級師範選科畢業剛勁鯁直作事嚴厲不稍假借光緒末其先君清政遇害君哀痛迫切與弟樹華多方偵刺卒將兇逆四人駢置於法民元任本邑高等小學校校長兼教育會會長以發展新文化爲務持最嚴格主義不辭瘠口講授學由均懷德畏威民元後本邑人材大率爲君造就首先薙髮提倡天足組織講演團爲政變以來開通陵川風氣第一人君弟樹華任山西陸軍第十五師師長早歲求學踳躑幾輟中賴君促成之所居東王庄段賈二姓不睦經君調

陵川縣志

卷九 士女錄

四十九

解無不悅服西南鄉民爭執待君一言立判財非有餘而急人之急年三十七以咯血卒子炳文山西教育學院畢業次炳武新民中學肄業

李克忠字蓋忱清邑廩生山西法政學校畢業充本邑自治事務所所長及勸學員勤勞盡職後充河東道尹公署科員民國十二年當選山西省議會第二屆議員提議廢除本邑油酒粉磨捐知事劉鳳銘辦事操切君彈劾撤退之十七年任山西陸軍第十五師軍法處處長君忠厚謹慎喜爲人解除糾紛鄉人無不愛敬焉

張文芳字蘭溪冶南村人清光緒間廩貢生援例得教職歷任洪

洞縣學訓導吉州學正晚年失明吟咏自適所著有老瞽吟待梓

張治孝字廉甫張蘭溪之猶子也學問敏贍書法圖潤喜吟咏所著有榆蔭軒詩稿惜享年不永以優廩生終

張士楷字鑑堂清宣統間恩貢生張文明先生之三子也素承庭訓得小試利器從之遊者多所成就惟晚年性喜經商人多近利少之然有口辯貿易之餘輒爲人排難解紛身歿之後人多思之

張治昌字世五邑廩生文芳之族姪也善屬文每試輒冠儕輩光緒間歲試所作小人間居爲不善一藝學憲寶熙批云當與宋

陵川縣志

卷九 士女錄

五十

人經義並傳書法毆陽善本惟骨力稍遜

李文藻字翰苑安陽村人清光緒間邑廩膳生品端學優工書善畫

馮經字子明清拔貢陝西候補州判勤慎自好民國初年任本邑財政科科長因省委巧圖索賄忿然動厭世想投東川硯池而卒士民莫不扼腕

楊舒字安甫又號寬夫長達予子工書畫善社交授河南巡檢歷任靈氏之欒川鎮南召之李青店所至有聲

好善樂施

明徐璣伋子正統四年荒輸粟二千五百石賑飢旌表授七品官

趙翺天順三年荒輸米三百石備賑勅諭旌表

徐鉞成化年輸米六百石賑飢旌表授散官

徐鑛成化中輸銀四百兩賑濟勅授散官

武鶴成化五年輸粟五百石賑荒勅諭旌表

徐樸成化九年輸銀助賑勅授散官

王興成化中輸粟助賑旌表

武信成化中輸銀三百兩授義官

寧溫寧演宏治中輸粟一百石賑荒旌表

秦洪秉公仗義萬歷十四年荒輸粟二百石濟賑

秦應雲輸粟二百石 秦孟魁輸粟二百石

陵川縣志 卷九 士女錄

李國卿輸粟二百石

張守庫

楊憲

武應鰲

趙守安

楊爾茂

秦應化

焦守金

王希鴻

徐大經

王孟節

蘇廷甫

秦一貫

訓導

馮時達

侯守真

馬尙升

李發榮

桑萬庫

郭大利

秦繼堯

馮學讓

生

以上各輸粟一百石濟荒

秦恒吉廩生自設粥廠活人甚多

李長茂輸米二十石

楊友仁輸米二十石

路孟宜輸米四石五斗助賑

王寬敦厚周謹隆慶二年捐資助軍餉劄授太醫院吏目

都志宏因學宮地隘捐地一畝有奇以廣其址
婁凌雲因遷學捐地一畝有奇樓屋一所

曹邦寧民信父雅有德量年荒出粟救飢由庠生授禮部儒官
李勤年高年劬尚義輸財萬歷元年給冠帶

楊文魁德重鄉評崇正二年出粟賑荒大部給以冠帶

徐允敬樂義修崇正二年煮粥活人有司勒石誦義

寧一相樂義好施崇正十三年大飢邑人餓死於道者相枕藉肉
骨散棄原野一相募人日往瘞之凡千有餘具子二景俞瑛皆
名諸生

婁繼祿捐助學宮地畝 曹廷撥賑貧撫姪

陵川縣志

卷九 士女錄

五十二

路達輕財好施

韓思順慷慨尚義

武深清排難解紛

都拱極秉禮鄉約

王一代重義敦倫

馮瑗友愛讓產焚券恤貧

徐岐好善樂施

清曹民悅邦寧子邑諸生孝友慈和如其父兄教子有方年飢與

兄民信共輸粟以賑鄉里事聞偕旌

曹延庚貢生民信子任紹興府通判承父志與弟延禧獨建明倫

堂凡費五百餘緡

都勳歲貢孝友耿介爲士林矜式居喪盡禮壬子遷廟學任創齋
廊尊經閣費五百金而不專名尤屬義舉

姚可頓教習文炳父康熙間兩舉鄉飲賓年八十餘拄杖井里慷慨樂施鄉閭憤爭者屢質成之有陳大邱王彥方之風調恤貧苦竟無虛日當孫令治縣時可頓獨捐倉谷五十石以備荒遇荒旱合村窮乏者給粟以濟之里人至今猶戶誦焉

王瑛敦倫重義終身不入城市耕鑿自給外即以散親鄰

武雍鄉飲耆賓老成典型經理修學獨多勞動邑人榜其門曰勞謙終吉

李孔懿急公慕義雍正間公舉耆賓且助修學宮凡邑之公事靡不盡力

和參化廩生兄弟讓產更能調卹宗黨

陵川縣志

卷九 士女錄

五十三

王黻性行慈和值荒歉與其兄彭設粥濟人貧者賴以存活

劉端制行剛方遇親黨輻輳事輒排難解紛且好義樂施康熙間

邑遭饑饉極力賑卹族里得生存者甚衆

劉堯裔廩貢生大節行義力追古人年荒析券周急惟力是視人有善輒津津樂道歿後人猶稱之

郭守璧友愛兄弟周濟鄉鄰爲善惟日不足康熙六十年荒出粟賑濟本村饑民多藉全活乾隆元年復以本村外路入長治行者必由牛皮掌山坡陡峻人畜疲喘行旅苦之守璧於村北特闢一逕寬平接高嶺舖約十里於三道河建石橋其泥塗者覆以石往來便之

徐最生平疎財重義撫幼姪本照顧以遺產親黨窮乏者有求必應多扶植族人貧不能婚娶者成全之

都燕性耿正鄉里爭訟每就燕解之貧困者不靳解推又捐銀六十四金修王兵備祠感其有全城之德事載祠碑

王中環素行端良尤踴躍慕義香磨河窄港口每遇水發湍激渡人時有沈溺之患中環獨力駕橋者十載乾隆四年乃倡議鑿山開廸以避河水爲久遠往來之計因身任其事不惜勞苦二年餘而成行旅至今賴之

馮君顯邑庠生康熙八年捐嶺西村松坡地一段於龍神祠以供修葺糧銀立單令四子分認後青松成林西溪村欲行攘去其

子滋出理前令平斷明以河爲界永歸廟祀

魏振璽公直存心寬厚待人樂善好施

王慎修貢生捐輸樓房四十七間爲書院巡撫阿賜額旌之有借貸不能償者率焚其券又嘗輸藥餌以救疾苦有司屢旌其門著有鳴情草

楊呈秀平生純厚康熙間大饑斗米錢五百餘呈秀出所蓄分濟族人及鄉里困餓者市行拾一包裹約百金即坐守不去或妄認詰數不符既聞沙場村徐姓因酒醉失金即寄語使來認訊其詳得實悉以還之鄉里稱美邑令韓區其門曰齒德兼優張爾相性耿直不詭隨事繼母如事所生教兩幼弟讀稍惰輒啼

泣垂訓弟感悟始憤發析產自取其薄者曰弟輩讀書無生計
吾竭力經營猶可成家值歲饑鄉佃多負租爾相悉免輸且各
恤其家爲人排難解紛里有疑皆取決焉

任子兆賦性溫良事親定省不懈父母病飲藥必先嘗之代弟償
債百金睦於鄉里嘗調恤其困乏者

郭壯京貢生鄉飲大賓石井村人乾隆四十三年春旱又值隣封
饑米商不至車集缺少壯京買三百餘石賑本村貧乏者

焦恒福職員慷慨樂施周恤族黨婚葬荒歉多所願助鄉里貧民
爭頌其義以上舊志

段引牛城東三十里艾蒼村人務農之餘以販糧爲業有義氣清

陵川縣志

卷九 士女錄

五十五

光緒二十六年因旱成災村人乏食鄰近儲糧之家以爲奇貨
可居又恐貧民無信縱出厚利亦不肯貸人公見哀鴻嗷嗷遂
以己業盡數抵押貸粟數十石民困賴蘇以上續

寓賢

唐秦略郃陽人神龍中任淄川令升高華尉卒葬陵川

申環金成都人咸通中徙陵川縣北之蒲水村養性閒居無縻爵

志卒葬村西陽山下有人題其墓曰可惜荆山玉沉埋曠野間

五代楊筠松時號救貧先生爲武氏相阡地於赤石一山下至此

金元好問遺山太原人甫成童舉舉業其先人秦思所以引而致
之者謀諸親舊間皆曰濩澤風土宗厚人質直而尙義在宋有

國時俊造輩出風俗既成益久益盛迄今帶經而鋤者四野相望雖閭巷細民亦能道古今曉文理爲子求師莫此州爲宜於是就陵川令之選命好問受學於郝天挺六年業成下太行趙禮部閒閒見其詩謂可繼杜甫京師稱元才子後過澤州有高平道中望陵川詩云書即零落頭今白腸斷荷衣出拜時尋請修金史方闕館會有沮之者不果乃構野史亭采摭遺事汗牛充棟輯金源君臣言行錄書未就而卒郝文忠經志其墓稱爲蘇軾黃庭堅後一人初以興定進士歷南陽內鄉令終左司員外入翰林知制誥金亡不仕

路元高平人爲省曹尙書郎五典郡事豪猾見畏人以路包拯呼

陵川縣志

卷九 士女錄

五十六

之累遷河南按察轉運使後卒老邑之附城鎮子孫遂爲陵川人

李俊民號鶴鳴老人唐韓王元嘉後家於澤州得河南程氏之學金承安中舉進士第一應奉翰林文字未幾棄官不仕以所學教授鄉里來隱於邑之嵩山後徙懷州俄復隱西山元世祖以安車召至誕訪乞還山遣中官送之卒諡莊靖先生

元徐貴字仲平雲中人卜隱陵川

技術

宋都嚮舉進士博學通醫政和間官宜議即掌太醫院事遠邇求診應手輒逾能以其術焉

清王石麟邑東石掌村人武生性質直好讀書留心醫學能通解
終日兀坐手一卷不釋惜天不假年未竟其術
寂滋南坡村人出家崇安寺爲僧住持南坡佛刹少得異人授精
外科善針灸凡無名症一見輒辨療無不愈時人比之華陀惜
無傳其術者

方外

晉樂氏二女先陵川人始娠感神光而生繼母呂遇之酷冬月單
衣見脛責採茹號於野泣血漬土產苦苗赤葉斑如持奉母雪
逾甚移家壺關紫園山使拾麥穗遺種無所得呼天號訴忽感
黃雲二女御之以升田野見之驚歎以爲仙去唐乾寧進士張

陵川縣志

卷九

士女錄

五十七

瑜所撰仙墨碑云羅之曲紅裳繡履歲儉求之即豐時旱禱之
即雨迨宋崇寧間王師拒夏乏食傳二女顯靈飯軍封冲惠冲
淑真人廟號眞澤 按石城許穀碑記二女晉時人今西溪有
廟

金通眞子秦志陵川人棄應舉學道隱王屋少室間後遇披靈老
人於上黨授道籙遂立局平陽元都觀校補三洞書訖倏風雷
大作即立化著林泉集二十卷

元珍講王禮義鎮人張姓禮崇寺僧洞曉禪機後枕右股而化
清康熙間有胡僧者髮垂至肩足不着履見人好爲隱語流寓南
馬附城間十餘年後莫知所往

雍正間有編筐和尚居縣南郭家川戒行潔清日以編筐爲業嘗
自作詩曰世情與我淡我與世情疎太行山上月皎皎一輪孤
又能預知某日涅槃示衆爲禮讖至日梵唱喧闐和尚果合掌
冥坐翛然委蛻

陵川縣志卷九下

二十六年徵集之書

女

金武公甫妻路氏以子貴累贈太夫人性淑惠通經史課二子天佑天和讀書雖盛暑嚴寒肅然端坐策之不使懈天佑詣京省季父文端公文端公命之試不第歸文端公奇其文遺書於家謂姪今試不幸不早第太夫人曰幸未第耳倘倖成名授以政事寧無美錦學製之譏耶更遲十年應試未爲晚也遂令二子閉戶讀書殫心理學後皆廷試第一

郝思溫妻許氏文忠公母多大節值北鄙用兵舉家逃匿山谷間舅卒旣禫與夫決策歸葬諸父兄以河朔兵亂不許乃夜啟殯

陵川縣志

卷九 士女錄

一

竊骸以遁至衛之長垣賊衆單重等行剽掩至人皆入窟室氏獨不去守骸以坐曰寧死可棄我翁之靈而求生乎賊至將兵之不爲之動賊厲聲曰若所守者何寶貨曰我翁之靈將歸葬先塋幸得濟河有死而已賊感愴壯其節遺白金數兩而去經旣長父欲其理家事紆目前急氏曰是兒志氣不凡况郝氏儒家淵源不竭可自我而涸乎我等忍窮數年俟之經感憤力學一日雞初鳴經猶伏几案書帙紛綸殘燈無焰氏見之慨嘆曰兒若是望不虛矣然母進銳退速也

明韓時妻牛氏夫亡無子年二十三誓守一節紡績養姑洪武七年旌表崇祀節孝

武繼姑父母早亡依兄簡議贅里人張旺爲壻未婚會簡有五臺役以旺代旺病歿役所同行函骨歸繼姑哭之慟叔母李曰何慟爲再擇所從爾繼姑云婦人守一安得此語是夕投繯死正統間旌表崇祀節孝

和憲妻蘇氏生子甫週憲歿氏年二十二甘貧守節始終不渝成化間旌表崇祀節孝

進士武思明妻姬氏思明早卒氏年二十五清閨自閔誓不易心正德間旌表參政王尙綱以雪竹詩題其壁祀節孝

生員武來遠妻韓氏遠歿遺腹生子世喜氏年二十翁姑在堂家貧食力生事死葬動合禮則州守馬汝驥上其事行縣表免子

陵川縣志

卷九 士女錄

二

役崇祀節孝

生員張智妻杜氏夫亡無子守節自誓見再醮者以狗斃目之年八十二婿徐模以禮合葬崇祀節孝

李嗜妻王氏夫亡遺腹子一躬勤紡績以育孤兒年八十卒崇祀節孝

趙源妻王氏年十九而源亡生子慶方七月終身紡績養姑育子姑歿葬之成禮成化間旌表崇祀節孝

張眞妻李氏年二十五夫亡子完僅一歲絕膏毀容誓不易志育孤成立以延張氏之脈成化間旌表崇祀節孝

舉人王潔妻和氏潔亡和年二十七孀居守節訓子如玉習父業

以歲貢授吳橋縣訓導成化間旌表崇祀節孝

府判張信妻馬氏夫卒於官一寒如洗依庶子爲命鄰里多慕其賢崇祀節孝

生員馬思驕妻郭氏幼有志節歸馬不久夫亡撫育幼孤經歷寒苦白首不易崇祀節孝

生員都一龍妻婁氏少許配龍龍病篤迎歸甫一月龍歿氏年十六念舅姑失所忍死孝養冰貞不數年逾八十萬曆年旌表崇祀節孝

郎娥兒貧女也議配侯存兒少養其家會有惡少窺之乘翁姑偶出遂逼之娥峻拒得脫不逾刻投繯死惡少遂正法萬曆間旌

表崇祀節孝

生員王克籽妻寧氏夫卒撫孤學禮爲邑庠名士又早歿氏躬紡績年八十而終大府旌表之崇祀節孝

生員婁子遇妻郎氏年二十喪夫遺孤繼世方七月艱苦育之成立甫授室而亡遺媳徐氏孝姑守節有司表其雙節崇祀節孝
生員徐炯妻趙氏年十六炯卒無子女貧不能舉喪資力母家年遇六十茹荼自甘傭指過甚多至夜分遂傷一日事聞旌表建坊崇祀節孝

生員婁子進妻徐氏年二十二孀居無子守節六十餘年內外稱之有司旌獎崇祠節孝

舉人韓國賓妻李氏夫亡年二十四矢志撫孤垂四十年祝觀察
題云出敦詩說禮之家真植紀維風之骨志守共姜孤全趙氏
崇正間坊表恩賜粟布崇祀節孝

宋希堯妻徐氏夫亡年十八遺腹生子廷彥督教食餼庠序得貢
觀察郭題請云十八斷絃于琴瑟近期遺腹于薰揉淒涼於可
生可死之間烈與慈並調劑于爲愛爲勞之益子以母成香流
奕世榮重巖坊萬歷間勅旌崇祀節孝

宋希文妻李氏年二十而寡投繯數四卒以救蘇賴兄撫孤廷瓚
爲諸生年八十五恩賜粟布崇正間旌表建坊崇祀節孝

省祭王學孟妻段氏事姑孝嘗以舌舐姑瘡時流賊猝至姑病臥

陵川縣志

卷九 士女錄

四

同兒媳牛氏委曲存孤侍姑不捨賊侵之罵賊被害與其媳同
受刃而死崇正間旌表崇祀節孝

生員王咸一妻牛氏即段氏媳也與姑侍祖姑並遇害事聞旌爲
雙烈崇祀節孝

馮一鳴妻武氏年十八鳴卒無子嚴守閨門紡績度日有司旌表
崇祀節孝

武松清妻王氏清卒撫一子立志不渝守節終身有司旌表崇祀
節孝

郎應堂妻蘇氏堂早卒禮事姑盡孝操守肅清有司旌表

趙守庫妻馬氏年二十五夫亡撫育遺孤甫得成立年已七旬有

司旌表崇祀節孝

韓朝士妻李氏年二十士亡士家本貧窮氏撫孤成長永堅金石有司旌表崇祀節孝

徐黨妻賈氏年二十二夫亡饑寒交迫守節不變有司旌表崇祀節孝

生員王餘慶妻和氏年二十五夫亡孀居守節撫育遺孤堅苦不變其操崇祀節孝

徐必昌妻趙氏年十九夫亡歷盡艱苦教子遊庠有司旌表崇祀節孝

武鎮宇妻都氏巡按祝題云松筠清操鐵石剛腸崇正間旌表崇

祀節孝

武新民妻馮氏夫亡氏年十八屢欲自盡以苦勸慰藉得不死守節終身有司旌表崇祀節孝

寧承法妻張氏年二十三夫亡氏厲志守節有司旌表節婦都氏憲綱失其夫姓名崇祀節孝

清生員都養德妻李氏年二十孀居撫孤迄于成立順治間旌表崇祀節孝

邑令李向禹妻王氏姜瓌亂兵猝逼城下氏曰君往矣守土無以家爲向禹率內騎出捍氏以白練縊于中堂有二婢從之

附載

關中順妻王氏年十六夫亡翁姑憐其少欲嫁之氏抵死不從守

節畢世崇祀節孝

焦崇保妻郭氏鬻飯爲生崇保歿守節不渝崇祀節孝

指揮武存智妻郭氏年十九指揮陣亡無子女氏守節不二人無

閒言崇祀節孝

生員王亮采妻婁氏亮采出繼叔嗣姜瓌變所生父母失養賴氏

委曲調停隱行其孝邑令給匾旌獎崇祀節孝

靳天挺妻牛氏年十八而寡子在襁褓有諷別嫁者氏剪髮齋而

明其不二曰兄爲孝子吾不能爲節婦乎終不奪孝子者甲子

舉人牛烱父牛魁斗也崇祀節孝

貢生王四門妻都氏家貧女紅佐養有孝名比姑歿舅耄孝謹愈

摯舅謂四門曰汝婦賢能爲我撫少子四岳無何四門亦歿氏當室四十年舉遺命哀切督課幼叔後叔四岳遊庠邑令旌之

崇祀節孝

姚之銛妻郭氏幼孩許字後之銛貧且病父母有悔意氏決計求死恐滋他議遂歸姚之銛尋歿氏年二十六歲苦志撫孤至死不怨督學汪灝表其閭崇祀節孝

千總武柱國妻王氏二十七喪夫二孤孱幼屢遭兵荒間關得全食貧教子武毅入泮壽八十終毅亦爲孝子崇祀節孝

生員武立紉妻王氏幼嫻女訓得姑懽年二十七喪夫守貞不二撫孤武雅爲名諸生泣曰吾初不殉汝父死者徒以汝耳汝能

成立吾願畢矣雅亦孝子知縣匾旌崇祀節孝

生員王者儻妻蘇氏二十二歲無子女舅姑垂白竭力甘旨舅得

晚子甫四歲舅卒氏撫育盡心俾成立焉崇祀節孝

生員張起鵬妻李氏夫亡氏年二十八紡績撫孤

武鵬程妻楊氏二十八歲夫亡苦志守節崇祀節孝

宋景星妻李氏夫亡氏年十九無子女立志晚節尤難得者崇祀

節孝

趙時通妻王氏夫亡年二十七矢志守節壽七十四歲有司旌獎

崇祀節孝

貢監徐之琦妻馬氏夫死撞棺頻絕鄰嫗救活守節全貞崇祀節

陵川縣志

卷九

士女錄

七

孝

王文穉妻曹氏金石盟心冰霜厲操年及七十六歲崇祀節孝

貢生婁銘妻秦氏千里扶櫬青年矢志白首完貞崇祀節孝

牛自通妻秦氏矢志靡他堅守節操教子成立崇祀節孝

廩生婁繼爵妻牛氏年二十一而寡遺孤方三齡矢志守節教子

成立崇祀節孝

都基泰妻李氏年二十一而寡並無子女可依孝事孀姑始終不

渝崇祀節孝

生員曹亮妻王氏年二十孀居撫三歲兒及遺腹子俱成立崇祀

節孝

生員和暢妻徐氏年甫二十子方一歲夫亡苦節撫孤五十年如一日崇祀節孝

序班王文炳繼妻朱氏年二十四夫故撫前妻子不異己出人稱其賢崇祀節孝

都如興妻武氏守節全貞始終無間崇祀節孝

監生馮學謙妻高氏年二十五夫亡矢志守節初終一致崇祀節孝

生員王牧民妻趙氏堅貞守節不易其操崇祀節孝

盧騰雨妻陳氏家故貧夫死益困陳自甘荼苦歷久不易崇祀節孝

陵川縣志

卷九 士女錄

八

李得會妻張氏守節惟一女相依女即烈女大姐也崇祀節孝

李得會女大姐父歿與母張相依爲命幼許字郝二耄待年而夫歿女時年十九聞之不淚亦不語矐母往唁撫膺一慟以絮塞其喉投繯死郝氏感之迎其柩歸與二耄合葬於魯山村邑令平表其門曰一門節烈崇祀節孝

靳居美妻王氏于歸未久居美遭火死於中州氏聞訃七日不食竟悲號而死崇祀節孝

王烈妻張氏年十九夫亡氏即持刀自刎家人驚覺救免越二日

伺守者稍怠潛縊夫柩旁葬之日闔村往送墓門崇祀節孝

徐可久妻趙氏夫亡氏二十八歲翁尙在堂子承宗方三齡赤貧

如洗氏飲血傭針爲俯仰資事翁盡孝教子成名崇祀節孝

廩生徐承宗即趙氏之孤妻王氏年二十四夫亡克遵姑訓不以貧改操教二子長牲乾隆辛酉科副元次喆廩貢生學使劉旌其門曰一門雙節崇祀節孝

廩生李蒞妻范氏年二十五夫亡矢死靡他撫孤成立學使劉旌其門曰柏舟遺躅崇祀節孝

廩生馮君就妻姬氏年二十八歲夫故姑老子幼氏事姑盡孝教子成名年七十五而卒里鄰稱之崇祀節孝

生員馮滬妻韓氏夫亡氏年二十六與孀姑姬氏朝夕相依矢無二心兩世冰節後先輝映崇祀節孝

陵川縣志

卷九

士女錄

九

生員閻達妻李氏年未三旬夫故無嗣竟以節終學憲朱旌其門曰寒松古雪崇祀節孝

婁必顯妻劉氏年二十四歲夫故家無升合矢志靡他享壽七十五歲而終崇祀節孝

馬佐妻焦氏佐亡焦年二十二誓死從夫地下以姑老忍死奉姑始經不渝崇祀節孝

張理妻武氏夫早亡家貧子幼茹荼飲蘖誓志守節邑侯蔣旌其門曰蘭谷幽馨崇祀節孝

馬冲海妻徐氏年二十六歲夫亡家貧傭針撫孤卒自成立年七十三歲而終崇祀節孝

馬錦妻趙氏錦亡氏年二十三歲上事翁姑下育幼子始終如一
崇祀節孝

王達妻都氏年少而寡矢志苦守繼姪承嗣人皆義之崇祀節孝
武唐妻李氏年二十四夫亡撫孤守節教子成立崇祀節孝
武煥章妻馮氏十八歲夫亡並無子女苦辛守節崇祀節孝
馮潤妻王氏年二十七夫亡心同金石堅不可移崇祀節孝
牛祐妻都氏二十四歲夫亡堅守志節誓無二心崇祀節孝
婁曠妻張氏夫亡年十九歲紡績自給撫子成立崇祀節孝
王世洪妻馮氏年二十八歲夫亡撫育繼子堅守冰節崇祀節孝
生員劉原妻董氏年二十六夫亡越三日始生遺腹子堅守冰節

陵川縣志

卷九 士女錄

十

不以貧窶易其心享壽七十五歲崇祀節孝

蘇正坤妻秦氏二十五歲夫故子甫二歲撫之成立崇祀節孝

張翔妻何氏夫早亡遺二孤甫成立而二孤皆亡尤節中之最苦
者崇祀節孝

宋喜春妻李氏二十五歲夫亡立志全節貧淡終老崇祀節孝

趙宗省妻傅氏年少夫亡家貧守節崇祀節孝

生員任嵩年妻常氏二十三歲夫亡生子方八月矢志守節撫子

成名學憲勵旌其門曰雪白松青崇祀節孝

張星燦妻都氏夫早亡守志不渝自甘茶節崇祀節孝

張義妻都氏夫亡家貧嚼柏茹茶苦節終身崇祀節孝

宋君西妻焦氏年二十三夫亡守節弗渝崇祀節孝

蘇百順妻韓氏年二十四夫故撫幼子成立事翁姑克孝紡績自給始終不渝崇祀節孝

廩生劉堯封妻賈氏賦性溫良持家貞靜夫亡年方二十五歲松柏盟心荻熊教子崇祀節孝

楊望妻劉氏年二十七氏本詩禮之族嫺閨範之教夫亡堅貞自矢始終一節崇祀節孝

李訥妻武氏夫亡年二十七撫孤成立人無間言崇祀節孝

曹灝妻趙氏年二十八夫亡一子甫三歲氏沉默寡言夫病篤時以氏年少恐不能守託孤子宗戚及夫歿後氏冰操凜然撫育

陵川縣志

卷九

士女錄

十一

遺孤卒至成立人咸比諸歲寒松柏云崇祀節孝

李星妻焦氏年二十六夫亡孤八歲一貧如洗嫂欲奪而嫁之氏訴於家長而免後諸孫遶膝克慰氏志崇祀節孝

李甲妻楊氏夫亡年二十四家貧事姑益謹撫孤全貞年七十餘而卒崇祀節孝

曹戶妻武氏年二十二夫故子幼撫孤守節孤已入邑庠又亡立孫承嗣艱苦備嘗崇祀節孝

郭世勳妻王氏年二十七夫亡氏傭針度日撫三月遺孤以迄成立崇祀節孝

曹署光妻秦氏年十九夫亡守節氏性至孝姑沉病三載諸藥不

効氏割股肉調羹誓服單衫三年以禱祀求姑病愈姑果痊邑令王旌其門曰事撫全節年六十九卒崇祀節孝

李尙妻李氏夫亡年二十一子週歲撫孤艱辛族黨稱歎

李兆籌妻周氏夫亡守節氏性不寶珠翠而甘荆布訓孤以義方勤儉成家崇祀節孝

和英妻徐氏年二十七守節克盡婦道教子成立克紹青箱崇祀節孝

徐希聖妻都氏少年守節白首完貞崇祀節孝

郭四妻趙氏年十八歲其夫以傭工自給病臥彌年氏以女工易食夫故泣盡繼血遂自縊夫旁崇祀節孝

陵川縣志

卷九 士女錄

十二

廩生武瞻妻李氏年二十三夫亡守夫命誓不他逝無愧世族之

裔崇祀節孝

寧聚平妻秦氏夫故氏始十九饑寒日迫守節不變崇祀節孝

廩生焦鵬南妻楊氏年二十七夫亡守節不易王州守額其門曰

筠松比節壽享七十崇祀節孝

韓自愛妻李氏二十三歲守節邑侯王額其門曰節孝完貞崇祀節孝

武敬勝妻秦氏二十三歲淡泊自甘苦節終身崇祀節孝

和聚才妻蘇氏二十六歲守節撫孤終身不二崇祀節孝

楊維鑑妻傅氏年二十三歲夫故遺子淳方週歲柏舟自矢教子

成立崇祀節孝

牛伯清妻李氏年二十九夫被賊逼死氏罄家所有以葬夫立志守節教子成立可稱女中丈夫崇祀節孝

秦夏妻申氏年二十八歲夫亡子蘇梅甫成童氏艱苦備嘗訓子成立壽七十二而終崇祀節孝

郭成妻楊氏年二十二歲夫亡自縊柩前署縣遼州王額其門曰明倫砥俗崇祀節孝

郭維漢妻李氏年二十六歲夫亡守節不易崇祀節孝

侯敏妻原氏年二十二歲夫亡守節白首全貞崇祀節孝

原春妻張氏年二十八歲夫亡守節撫孤誓無二心崇祀節孝

陵川縣志

卷九 士女錄

十三

任瑞齡妻李氏年二十七歲夫亡上事翁姑下撫藐孤崇祀節孝
李相妻蘇氏年二十七歲夫故柏舟矢志育姪繼嗣至成立崇祀節孝

李新怡妻楊氏夫亡年二十五歲守節不渝克盡婦道崇祀節孝
原通江妻段氏夫早亡撫遺腹子立志守節終始無玷年七十餘而卒崇祀節孝

王若熙妻李氏夫亡矢志守節鄰里皆稱其賢崇祀節孝

生員都來遠妻劉氏二十七歲夫亡守節事姑訓子三十餘年參府王旌其門曰貞孝崇祀節孝

生員王元郇妻都氏二十八歲夫亡矢志柏舟教子成名壽七十

而卒崇祀節孝

李進升妻李氏年二十一歲夫亡子幼甘心守節八十二歲而卒
崇祀節孝

王歛妻馮氏年二十四夫亡一貧如洗甘心守節隣里皆稱其賢
邑侯林旌其門曰松筠冰操崇祀節孝

牛燦妻李氏年二十八歲夫亡繼姪承嗣堅守冰節人稱其賢崇
祀節孝

傅珍妻牛氏夫亡年二十五歲繼子承嗣亦天氏獨力爲舅姑營
葬事事盡禮壽七十三而終崇祀節孝

王一貢妻馮氏夫亡二十九歲弱叔二撫立成人幼子四三人入

陵川縣志

卷九

士女錄

十四

庠壽八十八歲終訓導王額其門曰貞節崇祀節孝

王有聲妻路氏即一貢之媳夫亡二十二歲守節矢志撫幼百折
不磨壽八十八終訓導王額其門曰女中嬰杵崇祀節孝

張天恩妻李英姐年十七歸天恩未踰一年天恩寢疾病甚死矣
英姐號泣悲哀不食已復將己衣徧身縫劇遂投繯自絕天恩
復甦翼日天恩仍死崇祀節孝

徐五教妻王氏年二十五歲五教業儒自館歸病不起氏即粒米
勺水不入口家人勸慰矢志不移五教歿後越七日防少疎仍
投繯遂志崇祀節孝

侯玉春妻張氏爲縣民張迎喜圖姦毆逼氏矢志節烈寧死不污

迎喜勒其頸並刃其腹死迎喜梟首張氏奉部題請建坊旌表
設位於節孝祠

焦洪楷妻周氏年二十六夫亡僅一子七歲族屬無依矢志守節
傭針自給糟糠不厭卒教子成立壽七十餘

郭士祥妻武氏年二十八夫亡守節撫孤鎮僅二歲卒至成立入
縣庠鎮又早亡鎮妻馬氏撫孤秉仁甫六歲兩世守節存孤不
絕如綫鄉鄰稱仰之

生員李國柱妻劉氏貢生堯裔女夫亡氏年二十八無子女誓守
苦節賢孝親睦庭無閒言

孫景福妻張氏夫亡守節遺孤二長謙次謚皆幼稚家貧艱苦教

育成立

孫謙妻郭氏夫亡守節事姑以孝撫孤以慈鄉里咸稱之

孫謚妻李氏夫亡年二十九守節事姑撫孤克盡其道

武范妻王氏年二十九夫亡遺孤延昭方一歲家無升斗矢志苦
節宗族敬仰誨子女終能成立歷節三十五年

李協恭妻武氏年二十七夫亡無子祇生三女寧甘餓死誓不他
逝傭針自給艱辛備嘗歷節三十五年

武備妻張氏年二十八夫亡屢欲身殉復念孀姑垂白遺孤襁褓
遂忍苦上事老姑撫子元超入縣庠超能奉母訓以忠厚飭躬
氏六十七卒

寧良臣妻馬氏年十九夫亡氏苦節自守子一方二歲零丁孤苦
卒能撫育成人鄰族稱其冰霜成性備嘗辛苦允堪紀載以厲
清操

董琰妻馬氏農家女也年二十八夫亡遺孤二長甫六歲次初
離襁褓氏甘心守節撫子成人

都鵬妻蘇氏年二十七鵬時充兵吏解餉歿於西陲氏苦節以摩
線爲生上奉繼姑下育稚子有司旌曰完璧

李芳妻王氏年二十九夫亡一子萬資氏家貧苦守以紡繩自給
撫孤成立年六十六而歿邑令雷區旌曰操凜冰霜

徐之坤妻韓氏年二十九夫亡子一甫三歲氏絕無依庇守節撫

陵川縣志

卷九 士女錄

十六

孤備極艱苦年七十九歿

生員盧天植妻郭氏夫亡子一昌復天盧氏七門乏嗣矢節存宗
訪論繼孫萬順承祧七門之祀斬而復續歷節三十三年

徐俊妻王氏年二十七夫亡子一甫六歲氏堅心撫孤歷節四十
四年而歿

生員馬勳妻和氏年二十八夫亡子三歲氏冰清自矢撫孤成人
歷節三十年

牛賓妻段氏年三十夫亡家貧子幼並無依倚孀姑在堂奉養維
艱氏不惜劬勞上事姑下撫孤苦節四十九年而歿

吳文經妻李氏年二十五夫亡子六歲氏守苦節者五十八年

王作斌妻劉氏年二十五夫亡家貧苦節一子於中年復歿所遺
二孫幸得成立

吳廉芳妻劉氏年二十一夫亡並無子女矢志守節好行善事闔
鎮欽敬年七十四歿

和耿妻段氏年二十八夫亡子一方週歲苦志守節撫孤成立

生員焦系炎妻李氏年二十六夫亡遺孤二歲家計貧薄堅守苦
節上事翁姑下撫稚子子年至十八氏歿氏之婦道已克盡矣
秦元妻楊氏年二十四夫亡一子三歲而天氏誓守苦節立嗣承
祧居僻鄉日課耕耘以成家業今嗣子生孫元之先不至若敖
之餒者氏之力也年七十六而歿

陵川縣志

卷九

士女錄

十七

生員焦遇龍妻王氏年二十七夫亡遺孤欽甫四歲上事翁姑生
養死葬下撫弱子訓讀父書苦節二十三年

趙燕妻宋氏年二十七夫亡一子僅二歲赤貧苦節上葬翁姑下
育藐孤年六十一耳目皆無見聞因頻年艱辛所致閭里莫不
歎仰苦節三十八年

馬楚妻王氏年二十九夫亡遺孤一氏奉事翁姑克盡孝道教子
成立得列膠庠年六十四歿

馬子熊妻王氏年二十八夫亡一子十歲身無一椽之棲盜無一
斗之粟母子相依惟勤十指晝夜不息卒能爲子娶妻以延宗
祚苦節三十二年

武生郭彥妻郝氏年二十五夫亡遺孤二一甫六歲一僅數月氏守節養姑克盡孝敬訓二子成立以耕讀爲生歷節三十四年趙宿妻李氏年二十三夫亡並無子女氏欲立殉戚屬苦勸宿從弟輔將己子君寶承祧氏一生孝事翁姑歲時祀享無缺歷節二十七年

趙坤妻楊氏年二十七夫亡子一甫六歲矢志守貞撫孤成立歷節四十五年

生員李植本妻馬氏即節婦范氏之媳年二十八夫亡上有八旬之節母下皆髻鬪之嬰兒家淹兩世之棺野寄三喪之骨氏苦節存孤姑亡又復竭力營葬復兼葬數喪卒訓二子成立氏蓋

不獨苦節可傳其有功於李氏者亦不淺矣

增生王如旦妻徐氏如旦婚後屢就學於高平氏獨事翁姑凡承顏視膳靡不曲盡當一門染疾時如旦正在沉疴中而翁姑相繼瀕危氏侍湯藥衣不解帶者數月及如旦少蘇而翁姑垂斃氏於愴荒中殮具畢備如禮後如旦歿氏以勤儉持家年八十二孫曾森立本府太守朱顏其庭曰靈萱晝永

楊瑄妻郭氏年二十四夫亡赤貧如洗氏甘心守節窮且益堅趙琨妻秦氏年二十六夫亡善事翁姑克盡婦道撫養遺孤成立一生冰霜自矢

申繼祥妻蘇氏年少守節至七十八歲始終不渝鄉里敬之

宋加顯妻劉氏從容甘節教子義方數十餘載備歷風霜宛如松柏

郭璣妻焦氏夫亡氏年二十並無子嗣終日悲啼誓死不二以終苦節

秦名鴻妻路氏年二十五夫亡守節遺孤五歲後子復天氏苦節依姪夏以終其身至七十三歲歿

王承前妻張氏年二旬夫亡子方襁褓氏志切冰霜事翁姑以孝敬撫孤幼以義方從容就義曲成夫志前令胡給匾旌之

婁彩鳳妻和氏夫早喪苦節四十載紡績撫孤冰操如一張延武妻吳氏年二十二夫亡子方五齡事姑喪葬盡禮撫孤教

陵川縣志 卷九 士女錄

養成立艱苦備嘗鄉黨稱之

王殿妻徐氏年二十六夫亡無子甘守冰節孝養翁姑撫繼子成立

馬羸會妻程氏夫亡子幼仰事俯育艱苦備歷年五十八而終鄉黨稱焉

生員馮準妻張氏年二十六夫亡堅志守節教子入泮孝慈冰操足以風世

李乾妻楊氏夫亡無子矢志守節茹荼自甘壽六十八歲

徐承講妻張氏夫亡撫孤守節端嚴教子成人苦節三十六年

均載 舊志

武生任世熊妻趙氏年十五歸世熊姿性端淑事孀姑常氏曲盡
婉婉世熊卒氏年二十六一子永泰方三歲老姑少婦支持門
戶劬勞况瘁有難言者卒能督其子以有立俾任氏之緒延而
不墜孫步清步雲並入武庠

武金錫妻馬氏年二十六夫亡家貧如洗氏紡績爲生撫二子成
立守節五十八年壽八十四歲邑侯陳旌其門曰節壽流方

周允業妻王氏年二十六夫亡遺子尙在襁褓氏立志守節撫育
幼子備歷艱辛守節二十七年壽五十二歲

秦金牛妻王氏年二十四夫亡子幼家貧如洗矢志守節撫育二
子成立壽五十七歲

陵川縣志

卷九

士女錄

二十

張五保妻王氏年二十二歲夫亡遺子長三歲次一歲貧甚家人
勸其改嫁氏立志不移奉舅姑甚孝撫二子成立壽七十三歲
趙二池妻張氏年二十六夫亡家貧孀嫂改嫁氏矢志彌厲撫姪
成人壽七十三歲

徐天保妻牛氏年二十三夫亡子甫二齡家貧守節撫孤艱苦備
嘗壽七十二歲

張哲妻傅氏年二十四哲亡遺二子盡心撫養處妯娌間有艱苦
事輒自任嫂氏故苦磨之終無怨色嘗曰熒熒在疚皆伯兄是
賴一身之苦何足恤歷節三十一年

傅二則妻李氏年十九夫亡撫遺腹子苦節自甘年四十九歲而

終

李允豐妻李氏年十七允豐卒氏慟不獨生誓以身殉遂投繯死
庠生李懷刑妻徐氏年二十五夫亡無子兒憫其孤苦欲令再醮
氏立志自守之死靡他撫繼子遵禮慈愛篤摯後成立克繼家
聲

曹庶妻楊氏年二十六庶亡氏屢尋自盡家人防閑甚密後因父
母數勸勉遵父命孝養翁姑歷盡茶苦平居足未嘗輕踰門外
人罕見其面爲夫繼嗣教誨成立壽七十三歲

徐本豐妻郭氏年十九本豐亡氏矢志守貞孝於翁姑和於妯娌
撫繼嗣如己出守節三十二年壽五十三歲乾隆三十三年郡

陵川縣志

卷九 士女錄

二十一

守吳喬齡旌其門曰節並松筠

段六孩妻張氏張玉口女年二十二歲翁姑早卒夫亡無子氏慟
不欲生即日登樓自縊死邑令劉公匾旌之

平喜愷妻王氏草坡村王某女年二十七夫亡無子氏悲號欲絕
旣屬其夫叔曰善事父母我將從於地下次日遂自縊於柩旁
王以能妻馬氏年三十歲夫亡無子氏絕粒不食家人苦勸不從
越七日卒邑侯劉旌其門曰烈節可風

武君聘妻和氏年二十六君聘病亡無子氏誓死相從越一月氏
生父憐其年少微以言勸之氏聞悲號不食越五日而死

秦克治妻傅氏邑吏員傅勳女也年十七歸克治踰歲生一子甫

三月克治卒氏哀痛絕粒翁姑諭以死易立孤難氏飲泣受命立志撫孤未幾子得痢症殤氏拊膺長號曰我所以偷生者爲此一塊肉耳今無望矣遂悲鬱成疾而亡

秦二則妻郭氏年二十二歲夫亡無子氏即日自縊死

薛志魁妻王氏夫亡年甫二十篤志堅守或憫其貧苦勸之改適氏泣曰寡吾命也幸有子女不能撫孤成立生不如死守志益堅年八十二卒雍正五年邑令旌曰鐵石丹心

申廣洲妻宋氏年二十六夫故氏誓以死家人勸曰現有遺腹宜撫育以有夫後氏勉依其言月餘生子子復死氏即日自縊死趙鉗妻張氏年二十六夫亡遺一子英甫三歲氏竭盡勤勞撫養

陵川縣志

卷九 士女錄

二十二

成人英後入邑庠

鄧嗣真妻侯氏素性溫純克盡婦道姑病氏侍湯藥不解衣帶者

一年姑一女患癰症氏仰體姑意曲爲調護教子呈瑞讀書入

邑庠有聲教諭張旌曰孝慈垂範邑令施旌曰巾幗完人

龐二過關妻原氏夫亡日夜啼哭遂自盡

馮廷義妻侯氏年二十六夫亡遺子二長六歲次方懷抱氏痛夫不欲生因念二子無依朝夕紡織撫育長大邑令匾曰節壽可風

馮潤妻王氏年二十六夫亡遺孤六齡立志守節紡績度日六十餘年毫無閒言壽八十八歲

趙宏即妻秦氏年十九夫亡生遺腹子氏立志撫孤事翁姑盡孝
年至八十八歲

武號妻侯氏于歸後姑病故武號亦尋卒時氏年十九痛念翁老
無人奉養且有遺孕在身遂立志守節艱苦備嘗後撫孤成立
翁歿殯葬盡禮守節五十一年壽六十九歲當時咸旌其閭

王潭妻張氏年二十八歲夫亡有遺腹子家貧如洗紡織度日撫
孤成立年至七十而終

韓憲章妻李氏年十九歲適韓未及一載夫亡氏哀痛迫切即自
縊死有司紳請奉旨建坊旌表

張士楷妻李氏幼孀姆訓事舅姑先意承志得堂上歡及舅姑相

陵川縣志

卷九 士女錄

二十三

繼歿哀毀無聞以家計艱難夫欲出外爲生計苦無貲本氏脫
簪珥以助後士楷歿於河南氏聞訃絕粒誓以身殉因防守嚴
密不能死值小祥延請族人議立夫兄次子爲嗣議定氏謂家
人曰亡夫有子得以瞑目吾事已畢即於是夜投繯死時氏年
二十有二乾隆二十九年邑令給匾嘉獎之

牛喜保妻王氏二十四歲夫亡家貧立志守節孝事翁姑一子建
明不幸亦早夭媳李氏年甫二十感姑守義奉事維謹先意承
志茶節自甘氏歷八旬卒李氏率子先正合葬翁姑於故里鄉
黨欽其兩世節孝咸助賻儀

韓顯民妻李氏適韓甫二年夫歿三日水漿不入口家人防閑偶

懈即自縊死事聞奉旨建坊崇祀節孝

姚如宏妻張氏年十五夫年十八歸三月夫亡氏慟哭不食翁姑父母屢勸氏堅不移竟餓十日以死

周碩楚妻郜氏年二十八夫亡氏請於族人爲立繼嗣承宗祀既而繼子又死撫育遺孫備嘗艱苦守節五十一年壽至七十九歲

馬子恒妻李氏年二十八夫亡遺一女二子家貧如洗氏日勤女工度日及長竭心力爲營婚嫁年六十七歲而歿

侯選經歷武愿繼妻秦氏年二十八夫亡氏哀號幾絕念姑老子幼勉作未亡人事孀姑克盡孝養撫前妻子任己子新秦躬自

陵川縣志

卷九 士女錄

二十四

督訓如巖師俱入泮爲邑名士壽至七十五歲

生員徐五典妻都氏年二十九夫故遺二子長五歲次甫七月舅老子幼仰事俯育皆賴其力壽六十七歲

武倌妻李氏年二十七而寡遺子七歲家人以貧乏誘其改節氏飲泣携子之母家勤十指以爲衣食手口卒瘁終全其操歿年四十有八

常文林妻婁氏年二十八夫故遺子甫五歲家赤貧氏紡績爲生誓不改節撫孤成立壽至八十三歲

郎彪妻王氏事翁姑以孝聞夫早卒遺子相廷承廷延師以誨督訓不懈卒皆成立鄉黨稱巾幗丈夫

李必興妻靳氏年二十六夫亡遺孤家貧無活計養翁姑育孤兒皆倚針工度日以婦代子以母代父况瘁不堪四十八歲積勞病故

楊圮妻王氏年二十八夫亡遺孤一歲家貧氏立志守節撫孤四十八歲而終

生員王光謨妻郭氏二十八歲寡事姑撫子寒暑不怠守節三十二年歿六十歲學憲蔣旌其門曰玉潔蘭馨

韓元作妻魏氏年二十八生子未一月夫亡家極貧立志守節備嘗艱苦撫孤成人六十九歲卒守節四十一年

李新武妻武氏年十九夫亡無子氏誓不欲生家人勸慰氏念承

祧無人乃忍死繼姪爲嗣撫孤成立節操凜然

武詩文妻韓氏夫故家赤貧柏舟自矢撫育長子暨遺腹子備嘗艱苦和處妯娌毫無閒言自二十九歲守志至五十二歲卒

秦御楚妻王氏年二十四夫亡遺子二皆幼氏立志守節上事翁姑下撫稚子年至七十五歲終

宋振妻趙氏年二十五夫亡生遺腹子氏矢志撫孤子又早亡撫兩孫卒見其成立壽至九十三歲

生員牛景魯妻寧氏夫亡家貧無子繼堂姪士佺爲嗣氏訓誨不怠後入泮克繼書香自二十一歲至六十歲守節三十九年

張須妻武氏年二十八歲夫亡誓以死殉家人嚴防不懈及出殯

日氏乘間登樓自縊死

劉觀賢妻曹氏事翁盡孝持家勤儉年二十七夫亡撫孤守志心如鐵石年五十九卒

增生馮駒妻宋氏夫亡遺子三皆幼氏矢志撫孤拮据度日卒皆成立壽七十守節四十四年

魏安國妻李氏年二十四歲夫亡家貧舅年老且病氏奉養甘旨不缺竭力營醫靡所不至竟卒晝夜焦勞祭葬盡禮年五十而終

李有法妻于氏夫故遺二子家極貧氏抱幼孩力作以十指自活自二十五歲守至四十一歲里人哀之公爲乞旌邑令陳匾曰

陵川縣志

卷九 士女錄

二十六

比節程嬰

侯佩妻馮氏年二十六夫亡子甫週歲氏苦守四十餘年教子成立邑侯劉旌其門曰松筠勁節

張洪寧妻焦氏十七歲于歸十八歲夫亡生遺腹子撫孤守節四十年如一日

廩生武重妻宋氏年十九歲夫亡無子氏遵夫遺命繼小功兄之子爲嗣撫孤成立艱苦備嘗事聞奉旨建坊旌表

李景枝妻曹氏年二十三夫亡誓死念翁姑無人奉養乃勉稱未亡人以婦代子養老送終有子早歿繼堂兄子爲嗣多病百計撫育備極恩勤卒延一綫乾隆三十八年奉旨旌表其門

王茂生妻趙氏年二十夫亡有遺腹矢志守節孝事翁姑後舉一子撫養承祀乾隆三十六年奉旨建坊旌表

馮兆證妻董氏事舅姑孝夫死舅姑亦歿撫遺孤至九歲孤又病亡氏嘔血呼天安葬舅姑與夫畢遂自縊鄉人哀之勒石以誌庠生楊偉妻王氏年二十四夫歿時翁姑年皆六十餘二子俱幼氏奉翁姑訓二子長子未弱冠即食餼郡庠事聞有司旌曰金萱耀彩

李士俊妻任氏年十八夫歿子方數月氏號泣欲絕父諭以姑老子幼死將誰倚氏悟而止奉姑撫子冰操自矢仰事撫育人無閒言

陵川縣志

卷九

士女錄

二十七

趙子萃妻王氏年二十五夫亡絕粒不食或勸以死節易守節難乃勉進水漿姑雙目俱損氏侍櫛沐不離臥榻者三十餘年姪未週失恃氏撫如己子與乳母同起居盡心鞠育遂以姪嗣姪生父亦早歿繼配姚氏與氏同守稱一門雙節云

李小馬妻侯氏年十七適李姑早歿夫弟三人俱幼氏親撫養未期月夫亡遂投井死奉文旌表

趙培基妻郭氏年十八夫亡守節姑已六旬子僅三月家貧孤苦紡績營生姑歿以禮殯葬子亦成立克繼先志

廩生徐丹桂妻都氏年二十三夫故他鄉氏鬻簪鉞携柩還葬事畢自縊死後二子同時入泮邑令程詳蒙題請乾隆四十二年

奉旨建坊旌表

焦延文妻曹氏夫早卒遺二子家貧守節教子讀書茹荼丸熊數十年如一日後繼仙入邑庠

秦茂妻王氏年二十四夫亡遺孤甫週歲矢志守節後子病危氏焚香籲天晝夜哀泣子病竟愈克延一脉

任敏女年十八許字本村秦洪子聚興將婚夫病故氏欲往夫家守志家人阻之氏托以暫赴謁姑慟哭柩前自縊而死兩家遂合葬之

秦繼宗妻趙氏年二十一夫故遺孤瓚甫十月氏立志撫孤娶媳邢氏後瓚亦亡媳邢氏誓以死殉引刀自刎家人驚覺救免氏

日夜哭泣絕飲食杯勺不入口數日而斃節烈出于一門

趙傳妻路氏年二十夫亡守節撫孤壽至八十邑令吳匾曰柏節冰心儒學匾曰菊老梅寒

段福妻姬氏年二十九夫亡家貧無嗣家人勸令改適氏以死自誓堅確不移終身足不踰國年七十二歲守節四十三年

生員王碩士妻宋氏年二十八夫亡守節撫二子俱入膠庠年六十歲學憲呂旌其門曰懿行可風

王維熊妻趙氏年二十四夫亡撫孤娶婦未幾子誥亦亡與媳蘇氏同守弱孫成立壽七十八歲

王誥妻蘇氏年二十四歲夫亡奉孀姑撫遺子人稱一門雙節

張八則妻劉氏年二十九夫亡遺子甫一月家赤貧矢志不渝撫孤承嗣守節五十二年

李慶妻蘇氏年二十一夫亡孀氏欲令改嫁氏指矢自誓曰幸得遺腹子所係非輕將安適乎茹荼飲藥子克成立現年五十七歲

王通照妻劉氏年二十八夫亡遺孤甫週歲家貧傭工茹糝糠度日守節四十餘年

寧聖宣妻都氏年二十六夫亡無子矢志守節事奉姑至孝繼嗣一子守節三十一年現年五十七歲闔里贈匾曰節孝雙全

周允濟妻劉氏年二十一夫亡遺孤雙瞽氏盡心撫育得以長成

陵川縣志

卷九 士女錄

二十九

娶婦生子爲周氏延嗣現年五十一歲

徐貴全妻吳氏年二十九夫亡遺孤三歲氏冰操自矢教子成人守節五十年現年八十一歲

趙就元妻宋氏父爲鄉寧縣訓導年二十八夫亡矢志苦守旣而子亡撫孫成立現年七十七歲

郭永和妻徐氏年二十五夫亡遺孤甫週歲氏上有太翁及孀姑委曲孝養得其歡心撫幼子授室子亡撫遺孫上下五世一身彌縫備嘗艱苦守節三十二年

范獍頭妻郭氏年二十三夫亡撫遺腹子姑又雙瞽氏左右周旋扶持不少懈現年四十九歲

范九河妻馬氏年二十八夫亡遺孤七歲家貧氏以針線度日現年六十二歲守節三十四年

王七則妻鄧氏年二十五夫亡遺二子長三歲次一歲氏竭力奉翁姑撫二子俱長成現年五十五歲守節三十年

韓永餘妻郭氏年二十九夫亡遺二子皆幼赤貧如洗以傭工度日現年七十三歲守節四十四年

任明德妻李氏年二十三歲夫亡子甫三歲氏立志守節撫孤成人現年五十六歲守節三十三年

王憲妻宋氏年二十八夫亡家貧撫遺子授室子歿與媳任氏共守遺腹孫兩世苦節現年六十歲

陵川縣志

卷九 士女錄

三十

徐天佐妻郎氏年二十七夫亡子甫週月氏立志苦守撫孤成人守節五十五年

李培妻趙氏年二十七夫亡子幼立志守節後子亦亡訓誨遺孫早歲入泮守節五十三年

張自祥妻宋氏年二十八夫亡一子亦早卒撫遺腹孫備歷艱苦教育成人守節五十九年現年八十七歲

靳益晟妻李氏夫亡時年二十一遺一子甫三月氏撫孤成立守節三十一年現年五十二歲

崔元妻孫氏年二十七夫亡遺一子甫三月氏上事翁姑下撫孱弱歷十八年子又卒遺孫甫七月氏竭力撫養以承宗祧兩撫

遺孤苦節無雙

劉龍光妻都氏年十八歲夫故遺子未歲氏矢志苦守教子成名
學憲國匾曰蘭閨貞範

郭禔妻李氏年二十八夫亡子方三歲氏教育成立守節四十年
寧棠妻秦氏年二十六夫亡守志奉姑撫子茹茶飲血朝刷杵白
夜則績紡人所不堪現年五十五歲

李檜樹妻婁氏年二十三夫亡遺孤二歲氏欲以身殉家人咸勸
曰夫死爾復死藐孤誰恃祖嗣爲重身爲輕乃誓守辟纊一室
茹茶集蓼竟以成立守節三十一年

武生崔必達妻李氏年二十九夫亡遺子三歲家貧守志撫孤娶

陵川縣志

卷九 士女錄

三十一

室越三十年子與媳相繼先卒遺孫未盈月氏竭力撫養鄉黨
憐之現年六十九歲

徐進朝妻蘇氏年二十七夫亡遺子三歲家貧立志守節娶媳宋
氏後子媳俱亡撫三孫成立現年八十三歲

武維新妻李氏年二十三夫亡遺子四歲誓志守節績麻爲生甘
咽糟糠守節三十一年

馬潮生妻曹氏夫亡遺子三歲守節撫孤現年六十三歲

秦御魯妻牛氏年二十二夫亡遺二子長二歲次甫兩月氏欲以
身殉念舅姑年邁二孤均在襁褓遂誓守事翁姑撫懷抱晝夜
拮据心力俱罄二子稍長訓誡諄切現年七十歲

牛秉善妻武氏年二十五歲夫亡遺孤三歲立志守節孝事翁姑撫育孤子現年五十八歲

韓廷棟妻段氏年二十七歲懷孕夫亡家赤貧親族勸其改節婦堅不從越三月生遺腹子泣血誓守現年六十一歲

王憲章妻劉氏年十九夫故家貧無子家人誘其改適氏誓不從繼姪爲嗣傭工度日繼子又歿遺孫未彌月艱難百折撫育孤孫現年五十六歲

增廣生員和鳴琴妻馬氏年二十九夫亡遺二子尙幼長德宣次德昭家貧如洗傭鍼度日上事老姑下撫幼子姑亡殯葬如禮後二子俱早亡姑媳共守年至八十三里人咸稱其賢孝曰一

陵川縣志

卷九 士女錄

三十二

門三節

和德宣妻武氏即節婦馬氏長媳年二十五夫亡遺孤三歲氏忍死撫養子又歿繼嗣承祧奉事祖姑暨孀姑兩代孝養無虧現年七十一歲

和德昭妻趙氏即節婦馬氏次媳年二十四夫亡遺孤未週其姆亦早孀氏與之傭針奉孀姑三世嫠居熒熒一室冰操其矢撫孤成人爲娶妻生子更以次者繼與孀姆二門均得延世者皆氏之力也

張士敏妻王氏年二十六夫亡子幼氏矢志守節撫孤入泮現年五十七歲

生員王以幣妻郃氏年二十七夫故無子登樓自縊家人覺亟救之母舅勸曰慷慨赴死易從容守義難以程嬰之義勗之氏忍死求立後本族無可繼者訪遠宗某有數子哀懇族人繼其仲子將成人而卒氏更求其季子爲嗣教養兼至恩不掩義策之讀書竟以成名

孫士彥妻李氏年二十五夫亡遺子二皆在襁褓氏立志撫孤養而兼教卒皆授室成立長子琮早入郡庠里人賢之贈匾曰茹茶丸熊現年四十四歲

武德光妻趙氏年二十一夫歿即欲從死地下翁姑勸阻乃止然之死靡他同穴之盟固已心許矣飲泣守志三年枕淚未乾遂

陵川縣志

卷九

士女錄

三十三

憂鬱成疾而亡

程鐸妻蘇氏高平縣平頭村蘇德行女適邑人花落村程鐸父患噎症五日不食諸藥無效女憂甚夢神謂曰非服親人肉不可瘡女遂暗以刀斷左小指煨研入酒奉父服之果愈父後見其以帶禪手狀亟問以實對愴然傷之疾復作遂養病他所戒勿復令女知後數月女微聞潛至家自嚙臂肉煨熟恐傷父心陰置親戚所饋餽飪中囑侍者以進父竟獲痊

侯掌積女麥姐自幼許字同村邵聚延子春成後父厭邵貧欲悔盟女聞之於母前微露不從意母勸父父曰邵雖有盟言並未受聘遂許他氏納聘有日矣女潛使人至邵家謂姑曰兒邵家

人聞父以未受聘欲敗盟盍急行聘至日某氏聘至邵聘亦至父怒卻邵使於門外受某氏禮母謂女曰奈何女曰兒有定見誓不二心遂登樓縊死年僅十四

侯廷展妻牛氏于歸八月夫亡有謀娶者氏誓死阻之後繼子早歿媳郭氏感姑苦節亦不他適邑紳劉紹先武傳業牛希白等共匾其門曰苦節流芳

李璞之妻焦氏未出閨時其母病篤醫藥無功有術者言非食親人肉不能愈氏斷左手第四指雜糞以進母病頓瘳于歸後年二十二夫病將死恐氏他適微言示諷氏奮然曰君疑妾耶倘有不測請先以一指殉君遂斷其左手第三指夫故無子氏上

事雙親下撫兩弟終日操作艱苦備嘗終夜不寐則以百錢散地暗中索摸達旦乃止故能持久年八十三歲事聞旌表崇祀節孝

椅子掌張氏一門四節伯金興妻崔氏夫故無子仲玉興季通興妻皆李氏遺子均幼叔鑣興妻秦氏遺腹子產頭無髮指無甲氏曰此天不絕夫之祀也卒養成人妯娌四孀同以青年守節見稱於時

廩生武維城妻李氏少寡無出爲夫擇嗣兄有七子均幼氏獨取其次名鳳三者撫之後克嗣書香光大門閭竭蹶爲母氏請旌邑令強匾其門曰鐵性冰心

進士曹鴻舉補授河南溫縣未之任病故妻王氏哀傷甚至不出戶庭者六年餘卒事聞旌表

董二梗妻李氏二十七歲夫病故中州遺二女尚幼紡績爲生養女成人族人哀婦堅貞爲其夫之長兄立嗣名元英婚趙氏甫三年元英卒而趙改節婦邀族黨復爲英立嗣曰吾事已畢某月日時吾將逝矣至期竟無疾而卒

李環妻程氏夫故無子里人有勸其嫁者氏曰女不嫁二夫吾若嫁非人類也遂族中繼子承祧守節四十九年而卒

平川村民李太平妻原氏家甚寒二十七歲夫歿姑老遺二子尚在襁褓因自矢曰宗祧事重吾不奉親守孤何以延一綫之祚

陵川縣志

卷九 士女錄

三十五

遂課耕耘勤織紡艱辛備歷後稍有儲蓄即令子孫就學次子藻春以業儒入邑庠生長孫聃龍爲郡廩生

崔磐石妻成氏夫故氏決意殉節絕不哀痛從容將夫入殮夜半托言外出投井而死

楊樹坪妻薛氏夫亡自縊柩前有司贈匾曰貞一不渝

李傑魁妻徐氏十七歲夫故時姑亦歿氏撫二孤女侍一盲翁艱苦備嘗後翁故氏竭力營葬二女亦許字有家邑令給匾嘉獎其門

劉永聚妻武氏夫早卒繼姪承嗣敬事翁姑孝慈兼盡後翁姑歿繼子亦亡氏日夜哀泣而卒

王崎妻韓氏夫故遺子方四歲氏艱苦成家不惟井臼是操即耕
耘亦不憚勞守節三十二年

張克裕妻李氏二十九歲夫故與夫弟克昌妻韓氏同以青年守
節矢志不渝人稱一門雙節

徐社楊廣颺妻某氏貧而能守夫卒上奉二老下撫二幼以織爲
生且精於蠶每歲必豐入以爲節孝之報云

王貞女北關廂王德裕之女幼配嶺西村趙鳴鑾未娶鳴鑾死女
聞訃奔至趙家撫棺痛哭誓與俱死趙家逐之力奔訴公堂自
陳節守邑宰楊公嘉其志爲之捐廉議養送歸趙家女哀毀已
極歸趙未久病亡事聞建坊旌表

陵川縣志

卷九 士女錄

三十六

馮崧嶽妻申氏十六歲夫故家貧如洗氏欲從夫死念舅姑無人
奉養且有遺復子遂矢志守節紡織爲生人無閒言

李珏繼娶覃氏適李未期年而夫卒遺腹生子誓不改嫁撫前生
子女無間所生現守節十五年

商人侯文斗之妾買自吳楚不知其姓幼受嫡李氏教訓頗知敬
義李卒夫復娶張氏事張尤謹後夫卒紡績自勵或以異言挑
之即曰吾夫無子吾姊無恙相偕終老他非所願也守節三十
年卒

楊恩科妻馮氏幼嫻庭訓說禮敦詩年十七于歸閱九月夫故氏
哀毀幾絕矢志靡他孝事衰姑勤裕家計鄰里咸稱頌之守節

二十三年卒

張文英妻蘇氏秉性賢淑年二十九歲夫故遺子甫五月氏矢志守節之死靡他上事繼姑下撫幼子以孝慈聞家停已故翁姑及夫兄並夫各櫬未殯氏一一安葬如禮見稱於族鄰

田星橋妻段氏于歸後連舉二子長心安次心法星橋早卒幾殉孀居四十年家法甚嚴光緒間奉旨旌表

李汝良妻梁氏

李梓妻張氏

秦枝妻趙氏

生庠李士奇妻趙氏

馬子和妻楊氏

溫之雅妻牛氏

生增寧允謙妻徐氏

焦慕遂妻王氏

陵川縣志

卷九 士女錄

焦燾妻范氏

焦焯妻韓氏

郭祥妻郭氏

杜文廣妻王氏

郭寧妻李氏

李延諫妻薛氏

李景洛妻趙氏

張洪明妻章氏

李文烙妻蘇氏

宋國梓妻楊氏

張鉢妻徐氏

武發枝妻鄭氏

趙璧妻王氏

范資智妻秦氏

鄭保孩妻楊氏

吳勗妻馮氏

蘇自掌妻趙氏

程廷揚妻李氏

王繼善妻常氏

曹雲駒妻郭氏

蘇 愈妻李氏

牛承洪妻王氏

徐再溫妻羅氏

張得功妻秦氏

郎耀廷妻張氏

郎根保妻李氏

原秀實妻程氏

李守成妻王氏

段銀章妻和氏

吳子縝妻段氏

曹繼昶妻段氏

馬國幹妻李氏

張漢瞻妻苟氏

王貴榮妻楊氏

牛長羣妻李氏

范延順妻楊氏

焦 淵妻傅氏

段月桂妻趙氏

趙增太妻楊氏

李 見妻秦氏

陵川縣志

卷九 士女錄

賈寅恭妻李氏

楊作楷妻趙氏

李馨齡妻馮氏

李長太妻王氏

劉孟春妻李氏

張 鈞妻武氏

趙萌山妻王氏

靳文鳳妻趙氏

李 璿妻田氏

杜澍增妻王氏

宋家傅妻李氏

侯鳴山妻韓氏

李光昭妻董氏

侯 度妻韓氏

秦承益妻王氏

侯應麟妻張氏

宋含瑛妻王氏

秦肆三妻王氏

韓 恭妻李氏

侯永寬妻馮氏

員生

九從

員生

員生

貢附

武希威妻李氏
宋懷禮妻吳氏
李永林妻王氏
張光裕妻李氏
傅有懷妻都氏
秦 漆妻張氏
曹興發妻崔氏
郭守義妻秦氏
李本全妻焦氏
盧永山妻焦氏

路青雲妻趙氏
賈景元妻王氏
牛髻齡妻焦氏
張克昌妻韓氏
張永儀妻章氏
成家駿妻李氏
郎士超妻張氏
關順先妻王氏
郭其偉妻李氏
郭孚吉妻杜氏

陵川縣志

卷九 士女錄

二十九

郭汝泰妻李氏
姜 班妻王氏
趙承晉妻侯氏
郭永達妻曹氏
趙家驥妻侯氏
王一琴妻郭氏
孫丕和妻申氏
高一清妻韓氏
趙雄圖妻劉氏
張 錦妻趙氏

郭燦玉妻王氏
盧三狗妻姚氏
申憲林妻王氏
張文山妻趙氏
王永貴妻侯氏
郭其泰妻薛氏
孫以似妻楊氏
徐天祐妻王氏
寧汝真妻焦氏
張 楷妻魏氏

員生

生監

王秉鉞妻楊氏
侯宗起妻張氏
武遂法妻丁氏
田明存妻金氏
金成性妻郭氏
王三英妻楊氏
張興林妻王氏
郭天祥妻牛氏
王通明妻段氏
員生張慶元妻趙氏

李肇鑾妻侯氏
蘇錦妻和氏
田鐵鎖妻段氏
員生侯天賜妻郭氏
張九成妻李氏
王小三妻侯氏
段永智妻王氏
申保秀妻韓氏
王恩濤妻李氏
宋岐傳妻和氏

陵川縣志 卷九 士女錄

蘇計松妻王氏
徐三孩妻楊氏
宋成太妻王氏
董繼葉妻司氏
郭連陌妻常氏
王長發妻張氏
常德儉妻韓氏
侯宗棋妻張氏
杜懷典妻馮氏
焦來有妻馬氏

楊小孩妻都氏
宋長興妻王氏
蘇銓妻李氏
董保甲妻張氏
常席珍妻黃氏
常德讓妻張氏
侯應通妻馮氏
員生馮鏞妻侯氏
趙雲亭妻李氏
李廷科妻楊氏

趙 權妻馬氏
靳春菊妻王氏
劉三孩妻張氏
馬增春母侯氏
李 蓋妻吳氏
李 薰妻宋氏
張 浦妻趙氏
李興貴妻崔氏
趙祥兆妻張氏
楊法保妻周氏

韓修山祖母馬氏
王 玉妻都氏
宋先科妻李氏
李根榮妻王氏
王 鈞妻丁氏
郎全順妻秦氏
趙萬林妻侯氏
吳淇浩妻張氏
王福全妻宋氏
楊小孩妻張氏

陵川縣志

卷九 士女錄

四十一

楊日讓妻姚氏
李裕耀妻申氏
蘇金成妻王氏
和長林妻王氏
趙永德妻原氏
趙拴駒妻李氏
馬起房妻秦氏
員生 牛王美妻郝氏
王壘合妻牛氏
王成王妻牛氏

孫采寅妻張氏
李 慈妻張氏
九從 侯天興妻靳氏
趙喜法妻皇甫氏
王保祥妻申氏
王三多妻趙氏
侯振體妻王氏
王鎖貴妻申氏
王猗孩妻田氏
靳聚蘭妻崔氏

王松枝妻李氏

崔五林妻牛氏

員生楊青雲妻蘇氏

蘇保泰妻王氏

路煥文妻王氏

蘇保來妻徐氏

王添祿妻張氏

張永義妻韓氏

李復慶妻姬氏

徐義妻牛氏

郭聚香妻牛氏

段安琚妻李氏

蘇補孩妻李氏

韓邦解妻蘇氏

申跟孩妻王氏

李立祥妻王氏

王公桓妻張氏

路拴女妻李氏

王喜貴妻和氏

徐安保妻牛氏

陵川縣志 卷九 士女錄

徐天元妻王氏

劉羣鎖妻張氏

李永義妻趙氏

楊殿文妻王氏

李福香妻司氏

侯廷安妻宋氏

生武郭錦標妻曹氏

武堯祥妻徐氏

傅永順妻張氏

牛喜拴妻趙氏

光緒二十一年
節孝祠事實不詳

郭忠靜妻趙氏

侯本金妻王氏

王有真妻趙氏

生武常殿元妻李氏

李慈妻張氏

趙萬順妻郎氏

生廩賈湏妻武氏

生附賈灝妻李氏

生監徐士彬妻韓氏

以上均錄前志

王 岳妻趙氏 光緒二十三年奉旨旌續表

陵川縣志 卷九 士女錄

四十三